

松

陽

縣

志

第拾冊

卷十三

金石

卷十四

雜事

卷末

捐戶

244217
41

松陽縣志卷十三

二十六卷徵集之書

金石志

鐘銘 磨崖

印璽 石刻

塔甄附甄硯 碑文

斷碣殘碑名山寶貴吉光片羽希世奇珍自來金石之家雖窮鄉僻壤古刹荒邱無不竭力搽求我松僻在山隅碑刻無多流傳賞鑑者丁丁碑而外鮮有所聞自李金瀾廣文有括蒼金石志之作乃始得略有所表見然猶有限舊志碑記叅列藝文更少分晰今為另編金石一類庶較便於披覽而不致日久湮埋矣志金石

金石志一

鐘銘

松陽縣志

卷十三

金石

鐘銘

舊市淳和觀銅鐘銘

唐郭階

舊鐘碎裂已久高廣無出稽考重鑄新鐘
銘序均據鈔本錄入高廣行數亦不計

人之巧者與造物同功器之著者與陰陽齊方此邑紫府修建鴻鐘懸重千鈞量逾百石爰有南海賢士陳明羽人一言于邦千里來應祥金自積良冶子來立埏埴而成模制橐籥而運用大力斯拔高爐正開金火合流雲雷皆至紅光旁照踴躍密移善應長保於歲年仙侶永聞于時夜昔稱北宮之賦三月而成今觀東郭之師不日而就振于無境鳴而當律喜堯年之陶鑄荷聖澤而書名皇化遠冒于遐方景福願歸于魏闕銘曰

越金既聚鳧氏作則至用出虛宏之充塞既集仙聖永清
道德遠及千春方茲一刻蹲熊下峙盤龍上陳剛亦能吐
聲實爲寶形如天覆響若谷神遠韻無教用之不勤舊志

案舊志不日作不田皇化作皇孔充塞作克塞今查照

栝蒼金石志均爲更正

高煥然註

右銅鐘已碎僅存上截數片正書數十字在松陽縣卯
山永甯觀按寶刻類編載是銘爲郭階撰郭陽正書作
於唐乾元二年正月十五日今玩其筆意絕類褚河南
惜其文殘缺特於志中補錄之末二行有庭徐思簡劉
待相□□王思時□□及宣義郎字蓋題名也處州府

志云葉法善奏捨莊宅爲之宣和初方寇焚烈焰中不
爍聲亦不殺百人昇之不能動及鐘樓再造數人挽而
上之文云南海賢士陳明羽人是亦斯時道侶所爲不
盡法善之鑄也兩浙金石志

右唐淳和觀銅鐘銘今已碎僅存上一段在松陽縣西

舊市永甯觀

廣

於嘉慶丙子歲猶及見之尙存四五尺

上勒凌烟閣諸勳臣名因樓版浮搖不及周視鐘之一
區稍有微凹父老相傳葉法善乞元宗賜金鑄鐘適禁
中鑄此初成元宗遂戲以賜之法善謝畢卽以杖頭肩
負而來此微凹乃背痕也又云法善有言此鐘碎盡吾

當復出故凡鄉有水火祈禱事各持斧往紛然搏擊皆以銅盡爲悅今僅存一二尺耳按新唐書葉法善開元八年卒是鐘作於乾元二年正月十五日法善卒已四十年矣又叙云南海賢士陳明羽人云云則非法善所鑄已有明證何傳會若是耶兩浙金石志云存上截數片正書數十字此乃擊落遺銅所拓非懸上拓本也又云在卯山永甯觀按卯山離舊市三里係卯山觀非永甯觀也今據所見辨正

雲舫王尙廣註

松陽卯山舊有唐乾元二年鑄鐘迭厄於宋宣和方寇清咸豐粵寇之劫村叻撞伐又蝕其半既敝尙剩銅千

餘勛舊銘原題造自陳明羽人獨府志載吾祖越國公法善奏捨莊宅爲之桑梓吉光先澤舊器均宜修復無俟深攷光緒壬午邑侯皮公樹棠有感於崩應之說捐金付臆氏重製十月工竣觀者大悅

佐清

式慕侯功怵

懷祖德慶其成而爲之銘曰金聲肇震松陽以盛歷劫迺瘖風亦不競千年再造惟侯善政鐘之言動有環而聽潛壑蛟騰深山鳳應協此中聲人文地孕永鎮卯山銘昭無竟

葵生葉佐清

松陽卯山之下有洪鐘奉祀吾遠祖唐越國公係南海賢士陳明羽人所鑄也舊志謂成於乾元二年正月十

五日建樓置焉至宋宣和間方寇之亂樓敗於火而鐘聲不殺又千年迄清咸豐戊午辛酉粵匪兩擾松鐘始就替而碎餘遺銅尚千餘觔風侵霜蝕銘文亦泯先考葵生公輒摹摩古蹟慨然思興復恒有志而未逮歲壬午善化皮公樹棠來宰我邑肇發偉願商及我考盛業遂舉以是年十月二十六日畢工皮公之銳復是鐘蓋有驗於水旱災疫之禱可謂仁人者矣爰爲松民頌公仁且溯先德而併爲之銘曰鴻濛初開軒皇崛起迺誥榮獲洪鐘肇製皇皇我祖神降有唐闡揚元教道術光昌造化爲爐陰陽爲炭元氣鼓盪神物有爛百靈守護

歷劫不磨越逾千載剝蝕寔多有廢必舉公志傳壹太乙下窺蛟蛇鬱律山鳴谷應虎嘯龍吟遠繩祖武大振

元音

葉奉玉

今余家尙存淳和觀鐘碎銅一片內有戊字徑四分楷書又有一字不全似月字上半截徑二分許案此鐘舊有銘係郭階撰郭正陽書日久碎裂遺下碎銅千餘觔我先考於光緒八年壬午請於邑侯皮公籌款復鑄從殘銅內檢存此一片縱一寸八分橫二寸四分長方形珍藏寶貴亦敝帚自享之意爾

注東葉應龍

東街亭銅鐘銘

鐘高六尺四寸圍徑三尺六寸文十八行
楷書徑七分序每行九字銘每行八字

鍾銘 并序

景德二年冬十月二十

一日土□□重造明年

春三月五日 璽書

下六月二十四日鍾成

寺僧奉忠□□進士劉

成象藏事縣令李曙監

鑄貢吏周啟明作銘

皇宋景德 三年夏暮

松陽縣志 卷十三 金石

鐘銘 五

承詔改□ 命工按度

器非□舊 □□革故

金火交□ 雷電憑怒

星辰用□ □祇入護

泄若虹□ 圓如鼎固

瓦釜韜聲 戶樞先蠹

咨爾主者 典其嗚呼

進士李瑛書

□陽葉□鐫

右銅鐘銘文正書十七行在松陽縣署東側按文此鐘

奉勅所鑄並有寺僧等字當時必有勅監院字文有闕字不能詳矣列名數人亦不見舊籍而銘詞止言鎔鑄並無祈福等語又似不爲瞿曇作者

兩浙金石志

右宋景德銅鐘不知何寺故物今懸諸松陽縣署東街亭朔望火警則聲之銘文正書十八行現存一百二十二字進士李瑛書字徑七八分刻鏤陰文阮相國兩浙金石志所載文十七行軼去末行凡一百十二字今據拓本較多十字又相國跋云列名數人不見舊籍廣按栝郡志縣令李曙見職官表貢吏周啟明見仕跡門啓明字昭回龍泉人景德中舉賢良方正仁宗卽位召除

助教尋遷秘書省校書轉太常寺丞加勳騎都尉著詩賦千有餘篇惟進士劉成象李瑛二人選舉門則軼之其銘詞用遇韻惟末呼字在虞韻按呼廣韻本作誦詩大雅式號式呼禮曲禮城上不呼皆讀去聲則亦不失韻也

雲舫

案此鐘係舊治平鐘現在松陽縣署東街鐘樓附近孔教會余於乙丑冬會偕會友程君時雍登樓摩挲分寸繹文辭復得求人忻南轉等字較之栝蒼金石志又多五字第三行上字誤作土第十六行尔字誤作爾又鐘字从重作鐘蓋古字通用也鐘高六尺餘分界線三

層上兩層光澤無字銘列下層適當杵處故字多磨滅然順其文義猶隱約可辨今補足其文曰鍾銘并序景德二年十月二十一日上章求重造明年春三月璽書下六月二十四日鍾成寺僧奉忠經始進士劉成象戴事縣令李曙監鑄貢吏周啟明作銘皇宋景德三年夏暮承詔改煎命工按度器非求舊人忻革故金火交競雷電憑怒星辰用晦神祇入護泄若虹懸圓如鼎固瓦釜鞞聲戶樞先蠹咨尔主者典其嗚呼進士李瑛書南陽葉轉鑄實共一百三十八字今可讀者尙一百二十九字銘詞茂撲書法勁挺鑄刻亦復銳厲古色盎然令

松陽縣志 卷十三 金石

鐘銘 七

人愛玩不釋而斯鐘歷久完整毫無缺陷剝蝕之處洵堪謂鼎固矣再案改煎二字出周禮冬官考工記臬氏為量改煎金錫則不耗確切無訛其餘則更穩叶不差矣 高煥然註

望松禪院鐵鐘款

鐘高四尺九寸圍徑二尺一寸頌詞二行行四字正書徑二寸款四行行二十字末行七字正書徑一寸

皇帝萬歲

國泰民安

當院比丘行遠同信士武

斌共口信心各抽長財命 今查第二二字係發字

工鑄造答報四恩資勳三
有昔至元甲午下元謹題

匠者国清陳成記

右松陽縣鐵鐘款今在縣西太保廟款五行行十字末
行七字正書範鑄陽文其文詞與宋嘉定間靈鷲山石
搭銘一律亦為祈福追怛而鑄也按元紀至元有二一
為世祖一為順帝復紀此書甲午乃世祖三十一年也
雲舫

案此鐘在望松禪院即太保廟其上層有皇帝萬歲國
泰民安八字栝蒼金石志不載想係當時拓本未之及

松陽縣志

卷十三

金石

鐘銘

八

也又第二行第二字係發字尙隱隱可辨今均為補入
之字係鑄成雖不甚工整而饒有古意亦金石家所珍
賞也 高煥然註

天后宮鐵鐘款

鐘高四尺四寸副徑三尺二寸頤二寸
二字正書徑二寸欸十字正書徑一寸

興安天后宮

風調

香烟

皇圖

雨順

永久

鞏固

國泰

聖德

帝道

民安

彌彰

遐昌

道光七年立

案松邑城隅天后宮有二一在南門白龍堰沿爲閩汀公所一在城西忠義祠側爲興安會館此鐘係興安天后宮所造範鑄頌語分列三層每層四行行二字均屬頌禱之詞并列捐輸之目洵足爲僑民稱願聯合鄉情之紀念物不但祈福敬神已也雖歷年未久而珍貴則一旦此次修志假館於此晨夕瞻聽暇輒摩挲尤應編載以誌不忘

高煥然註

金石志二

印璽

南陽開國銅印

印以銅鑄成黃色堅質縱橫各一寸八分立方形象文四字徑八分



南陽開國古璽銘

唐歐陽純

令尹歐陽巡行阡陌道獲銅符泥沙蒙塞洗而讀之南陽

松陽縣志

卷十三

金石

印璽

十

開國遐哉邈矣葉公手澤隱耀千秋以待有德爰有真人子高嫡脈神物有靈應返其宅俾爾克昌俾世靡極

玉巖葉氏始祖渭叟公遺誌南陽開國印自大唐開元元年楚令尹歐陽公諱純在郊外勸農途遇二士爭競此印於瓦礫場中公諭釋而得之時靈虛見素真人遍遊羣岳適楚聞此謁之歐陽公復撰詩銘并印贈焉後三十年真人登仙卽遺於家族舉有德者護藏渭叟公於天聖二年甲子卜居玉巖之陽創建一堂以事耕讀子孫世居焉敬護至此考諸史誌此印歷經三千年有奇嗚呼桑海幾變更矣而此印悠久無疆必有神物護

持之者誠鎮家之至寶也後之護藏子孫知所事云大元至元元年乙亥歲正月裔孫其綦誌

栝蒼金石志王雲舫曰道光癸巳冬孟春原贈余古銅印拓本一曰南陽開國一曰道經師寶春原謂此印唐葉法善所遺其苗裔有徙居玉巖者今印爲玉巖葉雨霖家藏按上印九折篆朱文結構縝密深得古符璽法下印亦朱文有不止九折者於篆法殊不合法善故物也故僅摹其一然曰南陽開國史無明文終未釋然耳又曰按葉法善雖栝蒼人其自署稱南陽郡人從族望也授鴻臚寺卿封越國公故印文有南陽開國之稱自是法善無疑


其乞貶封父表有念臣身無橫草之功虛受茅苴之錫九卿之任下被江海五等之爵上應星躔等句則此印案栝蒼金石志以此印爲法善故物又云南陽開國史無明文詞多疑義殆未見歐陽銘詞及葉其綦跋語爾歐陽云遐哉邈矣葉公手澤隱耀千秋以待有德其綦云靈虛見素真人開元初年適楚訪歐陽公得贈此印靈虛乃法善道號則此印當在法善千年以前爲葉公故物特留傳自法善之手耳蓋南陽卽楚葉縣地也後人以爲葉氏封郡故至今猶稱南陽郡焉諸梁食邑於

此始改姓謂爲開國誰曰不宜茲由玉巖葉氏宗譜錄
此銘跋亦可以正枯蒼金石志之訛矣

高煥然注

道經師寶銅印

印係銅質古色斑爛微有剝蝕縱橫各
二寸立方形象文四字徑八分有奇



右道經師寶銅印由玉巖葉氏宗譜拓出并聞其後裔

葉君德潤言此印與南陽開國印現均存玉巖宗祠遵
先人遺命擇賢經管什襲珍藏視同拱璧故歷久無恙
則此二印者幾若與天地同休矣抑又考之道經師寶
係道家通用之符記法善數世爲道士此必其傳家法
寶雖較南陽開國爲近古而細覈印文與六書各家印
篆亦屬大同小異要不可遽從割愛也因併摹而編之
以資後之好古者

高煥然注

金石志三

塔甄 附甄視

祝延聖壽塔甄款

塔在縣學東隸書四字徑二寸五分

祝延

聖壽

昔梁武帝捨身崇佛天下聞風波靡貝宮雁塔所在多有今松陽縣治為古紫荆村有四浮屠屹立相望其文曰祝延聖壽隸法可愛按松陽寺宇每多梁建故金瀾師定以為六朝所遺也 雲舫

松陽縣志

卷十三

金石

塔甄

十一

右祝延聖壽磚塔在松陽城中塔凡四各九層高約五丈許合兩磚作祝延聖壽四隸書隸法秀逸非唐以後人所能髣髴余斷為梁武帝大興佛法之時民人建以祝君上者必先有此塔後有此城蓋松陽舊治離今治二十餘里唐貞元中始遷斯土故塔有當立街衢者殆遷縣治時不復移去耳松陽志失載殊為疎略余以隸法及地勢按之知為六朝所遺也

謹按祝延聖壽之見於史者如明宣宗時有僧自陳欲化緣修寺祝延聖壽帝曰古之人君皆享國綿遠秦皇漢武求神仙梁武宋徽宗崇僧道效驗可見矣世人終

不悟甚可歎也磚文有此四字猶唐宋碑識鐘款間有題皇帝萬歲臣佐千秋並皇帝萬歲太后齊年此皆民人釋氏頌揚時君之語松陽縣治唐貞元中已遷今地是塔決非後建何則民雖愛戴君王巷祝衢謠斷無有矗立當街致礙道路原本定爲梁武帝大興佛法時民人建祝君上攷梁武以吳下故宮建靈巖寺捨身同泰寺修長干寺阿育王塔建七層十二層浮圖崇尙釋教爲自古人君所未有於是天下聞風事佛多造塔廟競祝聖壽本此以斷具見考據精詳至磚文類多吉祥稱頌語東漢有萬歲富貴蜀漢有傳世富貴他如旣壽考

作長樂等磚無非頌德祝君是磚雖無年月紀元斷爲蕭梁故物識見明確可補志乘之遺

殷甫

案松陽城內輒塔向有四一狀元坊塔一仁壽坊塔一五福社塔一善應社塔今仁壽善慶二塔均廢惟狀元五福二塔尙存祝延聖壽塔卽狀元坊塔在縣學之東與沈晦狀元坊逼近故又曰狀元塔其塔九層圓橢八稜層各有門門旁兩磚排立左陶祝延二字右陶聖壽二字每層每門悉同餘無別字相傳爲梁大同四年建然亦無確據其五福社塔相距不遠兩塔相望大小形式大致相同惟無一字其餘二塔已坍有無文字益不

可考善應塔坍於光緒年間甄縫中多洪武錢則此塔必建自明代斷非梁時物矣亦以見祝延聖壽四字甄文惟狀元坊塔有之不得援引他塔而謂城中四塔皆有此文也

高煥然注

建平甄硯

硯長八寸八分闊三寸八分長方形篆文四字徑一寸許不等

建平四年

永元甄硯

硯長七寸八分闊四寸八分長方形篆文五字徑一寸

永元十五年

松陽縣志

卷十三

金石

塔甄

十五

右兩甄硯係漢代故物一建平四年一永元十五年我先考葵生公光緒間在於潛學任由門生方際雲明經所贈後我考聽鼓蘇垣飭匠仿製兩硯其甄質堅緻容墨經久迄今先人往矣而手澤猶存撫摹遺蹟曷勝扼腕

注東葉應龍謹誌

唐塔甄硯

硯長五寸闊四寸五分下圓上略銳元武形甄文六字正書徑五分銘四字隸書徑四分款三字行書徑二分跋二十一字行書徑一分許

玄妙□蓮花經

接儒入墨

石農題

此唐宿覺禪師真身塔甄也丙子四月得於松臺故址
右甄硯余於宣統辛亥秋得自天涯亭時余攝欽州篆
駐巡警於此亭適有鬻硯者予購得之甄質細膩雅似
端石背面甄文六字極工整仰面隸書援墨入儒四字
筆法高古旁鐫跋字二行尤翹秀非常但不知石農係
何時人無從查考又不知宿覺塔甄何以流傳至邊境
也其時欽方獨立余解組歸此硯置之敝篋乃得航海
南來茲因纂修邑乘摭尋及之區區一土壤耳竟得與
洪鐘豐碑共垂不朽物之升沈顯晦或亦有數存焉者
乎高煥然誌

金石志四

磨崖

案磨崖有作摩字者今查栝蒼金石志皆从石作磨間有一二从手作摩者想係筆誤并查劉涇等三巖磨崖其末有磨崖筆三字又張康國南明山石梁磨崖末有磨崖記三字原文皆作磨又蘇東坡觀開西湖詩百尺蒼崖尚可磨據此則磨崖之宜从石作磨毫無疑義矣雖韻會磨亦通作摩引左傳摩厲以須然此乃段借通用不足據也

高煥然註

上方山小赤壁磨崖

松陽縣志

卷十三

金石

磨崖

十七

隸書二大字徑三尺

小赤壁

栝蒼金石志王雲舫曰松陽縣志云石筍山石壁中有仙人赤腳跡宋狀元黃公度刻其石曰小赤壁道光丁酉冬李金瀾師攝篆松川約余同游余散步西郊至延慶寺舍利塔下又南踰均門循西而上數百步皆巉巖立石上刻放生潭三大字正書傍刻大花押皆徑三四尺更西上百步壁間刻小赤壁三字隸書徑三尺筆致嫵媚頗饒逸趣惜旁有小款一行剝落不可辨父老云此處昔為深潭山光波影一碧萬頃比年為沙漲矣東

指小村落云此卽黃公度所隱處今名其地爲黃公渡予東觀石筍山與赤壁相去三里許未嘗連續壁中亦無赤腳跡如志所云者黃公度爲紹興戊午狀元何故來隱此山亦無所攷又曰按黃公度旣隱居於此何以松陽縣志流寓中不一及焉余意黃或偶經斯地留書刻石抑或好事者索其書而刻之耳如麗水南明山有米芾大書三字亦未聞海岳過此頗疑爲劉巨濟所乞書也黃公度榜松陽有葉實者與之同年則遺跡有自來矣

今案小赤壁確在上方山之側舊志不知何以載在石

筍山之下其實上方山與石筍山中界姥橋一坑平曠數里絕不相連況此山距城不遠當時秉筆者竟不一遊而沿誤若斯耶誠以考古之難也

高煥然註

上方山放生潭磨崖

正書三大字
字徑四尺

放生潭

右放生潭三大字在小赤壁三字之下無款楮蒼金石志所云傍刻大花押今亦漫漶不可復辨

凌霄臺磨崖

正書三大字
字徑二尺餘

凌霄臺

右凌霄臺三大字向在西屏山凌霄臺磨崖府志謂米海岳書今偕坐辦許君復齋分編許君瀛士同往搽尋僅於臺後石壁上見此三字旁刻小款縉雲胡子文書六字正書徑一寸並無年月不知何時人意者米書久已剝蝕胡乃書此以補之歟然不可考矣

凌霄臺後壁樵雲煮石磨崖

正書徑一尺餘

樵雲

松陽縣志

卷十三

金石

磨崖

十九

煮石

右樵雲煮石四字相傳舊時刻在凌霄臺左側巖壁橫列如匾額米芾書今已不見但據拓本補入之

凌霄臺門外醴泉磨崖

二字橫列正書
徑一尺五寸

醴泉

右醴泉二字刻在凌霄臺後門口石窪之旁無款識聞係清時人書惟書法尙屬工整

雲巖端木國瑚等題名

正書徑二寸前四行行
六字後三行共六字

青田端木國瑚

遂昌吳世涵偕

饒慶霖葉維藩

來遊道光丁酉

仲秋廿

五日

題

雲巖李遇癸等題名

松陽縣志

卷十三 金石

磨崖

一十

隸書徑二寸前四行
行四字後一行二字

道光丁酉

孟冬嘉興

李遇癸麗

水王尙賡

同遊

右題名二段均在雲巖下龕石壁左右書法完整雖係

近刻字頗不俗

象溪山題崖

詩六行款一行
行書徑一寸

象川山水甲松州勝似南明夢裏遊列嶂四圍皆堞峙清
溪一曲抱村流龍蟠虎踞形如繪竹籟松聲景最幽卜築
於斯良匪偶富稱萬石貴封侯

道光丁酉中秋青田端木國瑚題

右端木太雀先生題崖詩在象溪村下北岸大路傍石
壁上墨蹟猶存惟日久漫漶已軼去十之二三余爲拂
拭摩挲細意吟哦猶可得其彷彿乃增補而足成之雖
點鐵未必成金而窮鄉亦藉生色矣

高煥然注

雲巖林惠臻磨崖

篆書四字徑一尺五寸款
四行行四字隸書徑三寸

松陽縣志

卷十三

金石

磨崖

一一一

雲崖石屋

光緒六年

十月望日

侯官塵叔

林惠臻書

右雲崖石屋四字在天門嶺之旁巖壁上篆法謹嚴饒
有古致時善化皮公宰松陽雅好古蹟林君爲其幕賓
工詩賦善篆隸此數字爲其自書自刻故雖磨崖猶然
生動活潑也

仙車巖題名

正書徑二寸
六行行六字

民國丁巳莫春

高煥然潘文衡

潘作霖劉可培

潘尙榮許士芬

吳紹文程時雍

因築路事來遊

右題名三十六字在仙車巖石壁上時因開闢緣溪大路同人來此估勘驗修恆休憩於巖室之間故題此案仙車巖在港口以上大溪北岸向係巉崑荆棘人跡罕到是年春由潘君作霖程君時雍等發起籌款開闢

松陽縣志

卷十三

金石

磨崖

一三一

通郡大路鑿山伐木蝨石築隄幾費經營始成孔道道旁有巨巖如屋寬廣逾畝容數百人聞係清時開石礦者然峭壁撐天洞壑連雲雖曰鬼斧神工猶如天造地設倘更加以人工接造院宇亭臺廣徵文人題詠以點綴之即成絕妙勝境雖雲巖松嶺莫以過矣向不知名余因其地近水車靜若仙鄉題其名曰仙車巖並於巖前建一笠亭以便行人憩息前年徵訪通志已為采及之庶勝地不至沈埋榛莽得與附邑十景並傳矣

高煥

然註

金石志五

石刻

孺子亭石刻

正書四字徑八寸
據抄本所記錄入

孺子別里

右石刻孺子別里四字在南州徐姓故宅宋紹興間朱晦翁來此與徐姓塾師講論中庸章句塾師加漸暗二字於滋長隱微之中朱子深然之遂援後漢南昌徐穉為南州高士親書孺子別里四字顏其居後人因名其地為南州建亭曰孺子亭刻其額於石以冀流傳旋即

松陽縣志

卷十三 金石

石刻

一三一

燬廢僅存拓本今則並拓本而已蝕之矣古蹟就湮未免可惜補記之以俟考古者 高煥然注

忠義碑刻

碑高七尺八寸廣三尺六寸正
書二大字尺有咫大小不等

忠義碑

右碑在城北天后宮西首忠義祠頭門外正書二字忠字長一尺四寸義字長一尺八寸省三筆碑字長一尺六寸初看大小相等義字雖省筆亦不之覺真神妙也書法蒼老異常筆力堅勁如百鈞硬弩翼翼有生氣洵足表彰忠義不僅以翰墨傳也惜不鐫書者姓名亦闕

恨耳旁有款字二行上行雍正三年九月下行松陽知縣楊國琦奉立正書徑一寸二分筆法較遜與三大字出自兩人之手聞此碑係城北人徐士堅明永樂間以明經任南京應天府通判忠直鯁概歿後追封朝靖大夫清雍正二年勅建忠義祠奉旨入祀是碑三字乃御賜者或出自雍正宸翰未可知也又案此碑止此三字並無記文故編在石刻門不參入碑文之內聊爲區別耳

柳池石刻

橫列四字隸書徑八寸

松陽縣志

卷十三

金石

石刻

一四

柳池魚躍

右柳池魚躍四字在天后宮右廂花園內相傳向係石刻日久碎裂後人以其拓本用木板製爲匾額現仍懸在池亭上隸法飄逸疏古旁有款識乾隆乙丑年桂月山右曹立身題好古者盍仍壽諸石乎

雲巖山門坊表石刻

坊高丈餘橫架石梁陰陽兩面各四字行書徑一尺二寸

雲巖勝境

別有洞天

右石刻八字在望松禪院西轅門外雲巖山道口道光壬戌菊月葉纘林立雲巖勝境四字尤翹秀可愛有此一坊譬如桃源洞口指示迷津頗足引人入勝而其字亦遂得因地而傳矣

雲巖石刻

橫刻二字隸書徑一尺八寸
款十三字正書徑一寸五分

松陽縣志

卷十三

金石

石刻

一三五

靜觀

右靜觀二字係石刻皮在雲巖上下兩龕中間梯級之旁款刻光緒八年十一月善化皮樹棠書時皮為松陽令多善政尤好修整寺院營繕名勝斯巖為附邑十景之最公餘時來寄興具有萬物靜觀皆自得之致題曰靜觀良有以也隸法仍復莊雅雖曰良吏亦雅士也其時重修鸚鵡塚手書貞文祠三字鐫之門楣筆意剛健得顏真傳亦殊可觀

金石志六

碑文

葉有道神道碑

即追魂碑一名丁丁碑唐開元五年三月七日

據拓本編入不計原碑高廣行數行書徑一寸一千一百四十八字

唐故葉有道先生神道碑

并序

栢州刺史李邕文并書

昔者誕發老君道純天地生德夫子身負日月且時宰不
宗主人勿用矧乎埋照浚谷潛盤窮山幽姿蛻於塵容素
若允於仙類豈辟命行矣爵服繫之而已哉公諱國重字
雅鎮南陽葉縣人也自少典錫羨高辛纂緒陶唐重熙后
稷邁種文王之允乃食於沈尹戊之子載封於葉受氏享

松陽縣志

卷十三

金石

碑文

一六八

國大哉邈乎逮乎祖乾昱克壯其猷永孚于德墜戶習隱
塞兌億坤碩膚長才通理博藝雖安車累至而堅卧固辭
故慶祚克開眉壽維永矣厥考道興性守官庭道敷邦國
居鬼從地率神從天受籙以怛之飛符以北之扼魍魎之
邪劉臺台之崇有足奇也至於揮扎落紙引弓貫革特起
五部廣推大餘侯誰嗣哉先生靈承道宗異聞訓誘弱喪
文貌幼尚純篤仙骨有象童心不萌專精五龍遍遊羣岳
聰以知遠明以察微達生死之苦體物氣之變嘗以靜貞
動耗息影歸止雲卧北壑林巢仙居人絕不鄰道阻且右
獨徃幽勝永歌隱淪放閑保和習虛致靜据五石之髓擷

三芝之英時或不留歲聿其逝緇鬢純漆韶顏渥丹事適
元同神與道媾惟寂惟冥不飯不食數十載於茲乃升聞
帝庭駿發皇眷簡才受命降尊加禮將之以文馬速之以
暢轂先生盱眙長揖握手高謝曰自昔帝舜登庸德輝允
鑠光武繼統吏道孔嘉且薛方逢萌備外臣之禮虞仲夷
逸終處士之業豈垢俗疵物偏貢介性將探道慕類坐致
奇齡使者蓄而然之疑申遂行之旨乃周覽廬室躬省倉
廩考疇人之疆畝訊家僮之作業皆儉以遵約安能惟始
味不甘口色無養目信以爲著誠去僞敢守難奪順風可
卽強起曷至焉遂虛覲復命慙歎同列朝廷企其高渴其
道聆嘉聲而屬想者豈勝言哉有司以天元書闕星度官
弛亡五德之運謬四時之分荆鬼越祥不知所況子亥母
癸烏識其源皆乘遽遠尋請益傳受可謂繩誠列而曲直
徵衡誠懸而輕重立粵惟博物君子豈伊小說鯁生嗚呼
天不持久人將復歸頽年迫於期頤遠志屈于摧落小兆
幽石託墳清林逸人不追國士靡憲泉石沮色鄉縣失聲
豈無他人惟子之故允子慧明贈銀青光祿大夫欽州刺
史公罔替厥猷代增其業啟秘籙之高妙揚元津之洪波
道微若聲心麼若氣吹律暖谷運厯知天屢下辟書終不
應命孫子景龍觀道士鴻臚卿越國公幼得父書早傳成

法黃念有訓邁迹自身讀天下之書備方外之術火滌淫
祀劍誅羣妖恩開五君名動四國其入也排金鎖謁紫庭
爲帝傲吏其出也法玉京坐元寺作人宗師故能大匠道
門冢卿朝右禮食軒座寓直禁廬矣嘗以理氣自強登老
益壯雖暮景急節而純孝孔哀是獻封章願拜墳墓有軫
帝念載形王言神札以飛傳瑞乃發羣公帳餞列藩郊迎
朝章有輝鄉人皆慶枉以末技揚于孝心惟先志以追遠
立豐碑以紀德夫何間然詞曰宗門素履家代隱仙道一
相孕薪火交傳黃公術在赤水珠聯道開幽鍵性與直筌
一門累祖四世百年抗迹巖谷消聲天地卓爾遐舉藹然

高致麝以臭焚珠以明墜人則有心徵亦不至保身匪媮
全樸爲利孝孫增業明辟順風志嘗無忝事或不同徵賢
朝滿舉逸山空曷繇高枕克謝代工測微達變盡規納忠
皇眷雖渥孝思亦深章服燦燦博駟駟載違廷闕是展
坟林紀石追遠昭銘率心孝忠事立榮歿寵今遐超古始
永憲江南開元五年歲在丁巳三月七日侍者清溪觀主
詹元一丁

唐開元間葉法善以道術遭遇元宗時李邕爲處州刺
史邕以詞翰名世法善求邕與其祖有道先生國重作
碑邕從之文成請并書弗許一夕夢法善請日向辱雄

文光賁泉壤敢再求書邕喜而爲書未竟鐘鳴夢覺至
丁字下數點而止法善刻畢持墨本往謝邕驚曰始以
爲夢乃真耶世稱此碑爲追魂碑舊以爲靈異歐陽文
忠公云有道先生葉公碑李邕撰并書余集古所錄李
邕書頗多最後得此碑於蔡君謨爲余言邕之所書此
爲最佳也

舊志

附錄兩浙金石志右碑在松陽縣文二十二行行書徑
八分輿地紀勝云唐故有道先生葉公碑李邕撰并書
世傳法善求邕書不可得夜追其魂書之俗謂之追魂
碑今按拓本似經後人翻刻非北海原跡末行丁字下

作四點傳是其魂書至此聞雞鳴而迫恐未必然又按
舊唐書本傳邕貶栢州司馬在開元三年以後十三年
之前其爲栢州刺史在配流嶺南後新唐書則云開元
二十三年起爲栢州刺史此碑立於開元五年三月題
銜已稱栢州刺史與兩史不合葉國重史傳無文其孫
法善傳祇及父慧明又稱法善自曾祖三代爲道士皆
有攝養占卜之法而不詳列其名今碑載乾昱生道興
道興生國重國重生慧明慧明生法善乾昱爲法善高
祖是五世皆習黃冠之術矣洪筠軒頤煊云新唐書葉
法善傳云開元八年卒或言生隋大業丙子此碑立於

開元五年時法善已百二歲故碑云雖暮景急節而純
孝孔哀今重摹本脫暮字

李金瀾栝倉金石志

此碑係曾大父萬挺公得之某處襲什家藏垂及兩世
至清光緒年間先父任江蘇丹徒篆遇手民某精工剖
剔始將此本付之梨棗計字千餘版念一塊所費頗不
貲查此碑有灰版原刻之別惟灰版脫一暮字原刻則
否此真贋之所由分也間有另刻暮字以補之然魚珠
卒難淆識者之鑒此栝蒼金石志言之綦詳自先父將
原刻翻成後應求者之請一時拓出不下數千張然當
時版數分塊鐫就未經排列僅足爲法帖之本茲將塊

數特加裝整按文部次不惟爲法帖合宜卽爲堂幅亦
較稱便爰撮巔末而記之如此民國七年歲次戊午夏
月齋孫應龍注東謹跋

謹案此碑原刻在卯山剝蝕已久今惟古市葉氏翻本
然以舊志所刻證諸栝蒼金石志譌字甚多細繹文義
有彼是此非彼非此是者如生得作生德後谷作浚谷
素尙作素若於德作于德宮庭作官庭死生之占作生
死之苦据五石作据五石時哉作時或緇髮作緇鬢不
飲作不飯昇聞作升聞處子作處士疆晦作疆畝聞列
作同列書缺作書闕其原作其源屈於作屈于卜兆作

小兆冈替厥繇作罔替厥猷作仁作作人列蕃作列藩
揚於作揚于其詞曰落一其字真筌作直筌卓尔作卓
爾全樸作全樸曷由作曷繇粲粲作燦燦傳駟作博駟
孝終作孝忠又如尹戍之子榮歿寵今栝蒼金石志則
作尹氏作榮沒至如胤字立字曆字清人因避諱作允
作元作厯與原本不同更不足言矣今悉仍其舊以俟
考古者民國乙丑冬高煥然註

葉慧明碑 唐開元五年七月七日

據兩浙金石志錄
入不計高廣行數

大唐贈欽州刺史葉公神道碑 并序 江夏李邕

松陽縣志 卷十三 金石 碑文 二二

國子監太學生

公諱慧明字德昭南陽郡人也其先系自軒后殄于周文
聘季食沈子高封葉因為氏矣逮問政□孔好龍得真代
有聞也昔者惟帝興運乃聖炳靈風雲相從人夢通感閤
氣駿發良弼大來有開必先憑物為為□自然矣則我使
君降□府乘道流追踪隱淪叶契幽叟結廬澗沚考盤巖
椒同人利貞遁代勿用雅好酒德尤邃老經話言解頤精
□絕倒誘進不倦虛納盡款好事集門長者闐里每至升
月帷戶和風林薄植杖嘯谷席叟琴山泰然樂生澹乎忘
老方□維性壽遡神僊徇赤松之遊縱黃□之術外身先

物歸根致柔緣以大均持以大定色理不盪寵辱不驚繩
繩焉熙熙焉孔德之容罔可測已故師長旌禮邦族興化
智者謂智仁者謂仁雖褐塞桑樞紵衣韋帶必避途加敬
襄風惕息焉是用克聞于家大育厥允則我越公襲上德
延慶靈生而知之學而習之有專門之資不得承之業纔
齟犴道旣冠同元訛遠岳之福庭覲幽尋之方士陳咒雷
駭吐刃電光沉海莫濡蹈冶匪熱呵萬鬼搦百神啓陰官
之符變冥司之錄追究往事坐知來茲膏盲無所遁其形
霧露不能滋其疾奇跡多緒嘉聲日聞是以 大君孔
休辟命薦至入自卧內問以咎徵造膝必誠遇事偕中時

更四紀代且五王順風呂請天師敷衽以近

皇極緇

素莫能出右公卿是惟虛左

國家有事天地將旅海

岳公嘗致禮加璧能事潔羞傳駟載途郡邑迎謁者歲四
三焉自頃賊口畜禍小人吹蠱敢爲戎首與此厲階

天步未亨人事將殆公乃極陳幽贊大啟聖猷枚卜撰辰
並走羣望作爲邦翰先□主憂殄勦元兇翼扶 皇統

是嘉厥異式揚爾忠爵賞懋于身寵贈光乎考匪此父也
曷訓其子匪此子也曷揚其親松楸已行碑版未立永念
終古追薦孝思驟請 闕廷第如江介遠訪才子枉逮

鄙夫趙括論兵多缺舊學班固述史實賴家書顧惟成章

實愧貞石其詞曰

真隱夷軌默僊解形倬哉獨立企古遐征殆庶元德升觀
丹經服鄉不涅光和无營築卜岑渚□藥侍琴徐嘯風谷
緩步月林白雲怡意清泉洗心曷勝不往曷奇不臨迹因
神遠情隨地深舉代方藉皇□未軾肇□懿子載揚令德
左慈致物越人辨色司察鬼謀役使神力寵被 五君
聲聞八極日嘗薄蝕 國有多難兇慝□楊忠烈憤惋
亦既先覺克圖幽贊 皇哉神武赫然天斷薄言即戎
于以戡亂 帝念疇庸與開列土豈曜厥身實贈丐父
朱藩乃錫紫綬是與存致歿榮忠伸孝舉列列桐柏緒風

松陽縣志

卷十三

金石

碑文

二二二

與悲表墓有闕紀德無詞哀哀嚴陰樂樂孝思孰傳終古
是建豐碑 贈慧明銀青□□□□欽州刺史子道士

法善授鴻臚卿封越國公開元五年太歲丁巳鵝尾七月

夷則七日甲辰建缺□州張□□□□檢校樹碑侍者

洪州翊真觀主盧齊物□

葉欽州碑乃八分書迺雅大有東京遺意久傳為北海
書然碑首斷落不敢定金石畧載有道先生葉公碑而
不載此碑又趙明誠錄有道二碑一為邕行書一為韓
擇木八分書此碑乃八分書韓耶李耶姑闕疑可也然
其書佳甚日數閱之而不倦孫退谷庚子銷夏錄

右唐贈欽州刺史葉慧明碑今在金鄉縣書撰人名皆缺分隸雄駿亦韓史輩手腕但過涉怒張微乏藉蘊則小遜耳慧明乃道士葉法善之父史稱睿宗卽位謂法善有冥助之功故拜爲鴻臚卿封越國公又贈其父爲欽州刺史夫以一道士而位之卿尹爵以上公贈及泉壤名器之濫可謂極矣洪邁容齋三筆曰自唐代宗以僧不空爲鴻臚卿開府儀同三司其後習以爲常不知睿宗已以道士爲鴻臚代宗亦踵行其弊政也吳山夫金石存右碑在宣平縣治沖真觀原石久佚所存重刻本字多訛錯此據何氏家藏舊拓本錄之文二十行八分書徑

八分首行標題下有江夏李邕口國子監太學生云云則撰書明是二人趙明誠金石錄以爲韓擇木撰并八分書者誤也舊唐書葉法善傳云梧州栝蒼人而此碑云南陽郡人蓋碑溯始封傳則據其譜籍耳其云寵被五君者謂高中睿元四宗與天后爲五也兩浙金石志

按葉慧明碑在金鄉縣書撰人名皆缺或云李邕文韓擇木書隸法雄駿亦稱名筆慧明墓現在松陽何以神道碑遠在金鄉殊不可解兩浙金石志據重刻本錄入以爲在宣平縣治沖真觀余曾見宣平人重刻葉有道碑變行作楷大失北海本來面目而翻刻金鄉縣之慧

明碑實未見也聞松陽人亦有藏弄者然究不知其何時何地所翻石之存亡亦不可知今仍兩浙金石志之舊亦錄入

括蒼金石志

賡幼時侍先大父觀族祖星泉公家藏葉慧明碑隸書拓本其第一行二款連書上爲江夏李邕撰下爲國子監太學生韓擇木書會記賡問先大父曰韓擇木爲何人大父曰卽少陵李潮八分小篆歌所云尙書韓擇木是也額之左右作二神像臂有肉翅足爲龍爪旁有雲氣賡指二神又問曰此何物也大父曰一爲雷神名豐隆一爲風神名飛廉取雷風相薄水火不相射之義是

豈金鄉舊拓本歟抑松陽另有此刻實不可知碑之下已斷泐數片合而搗之故下有圓圈泐痕後於松陽有以是拓來售者其中字多錯訛如食沈之食作良因其翻本棄之今復求星泉公藏本不可得矣

雲舫王尙賡

按慧明碑山左金石志亦收云在金鄉縣已佚兩浙金石志所云何氏家藏碑疑卽金鄉舊搗也

芝庭王尙忠

攷吳山夫金石存所載慧明碑內追蹤作追從熙熙焉作漑漑怡意作怡志兇慝口楊作兇慝乃楊附誌之以俟考古者辨之

殷甫鄒柏森

唐玄宗御製葉尊師碑

唐開元二十七年

據舊志錄入碑之高廣行數均不計

唐葉道元尊師碑記

唐玄宗

朕聞軒轅三皇之盛者尊廣成唐堯五帝之盛者師尹壽夫以聖人之道教聖人之才守之七日又守之九日朝徹而後能見獨是道也入水不濡蹈火不熱嘯叱風雲鞭笞魘魅無方而後進物是神也神則惟變道亦旁通苟得其人抑所謂神道設教者也師諱法善字道元自諸梁食沈是謂葉公邑亦如之因而命氏則昔爲南陽人也曾祖道興祖國重父慧明贈歙州刺史黃邱園者一貫吾道食舊

松陽縣志

卷十三

金石

碑文

二二六

德者百代可知故名溢宇宙之中身在江海之上則今爲括蒼人也至隋大業歲在丙子法師是生凡六百二十四甲子洎我開元歲在庚申形解升雲則春秋百有五矣其生也年長而色若孺子其化也委蛻而神則默仙嘗從朕遊仰之彌高鑽之彌堅藏察無象鉤致不測若言匡國輔主鼓舞發揮焉朕可推而尊之不可得而臣也其始終出處之迹可得言者初師七歲涉江而傳臨目而萬八千神咽胎而千二百息或潛泳水府之憇于華堂峻宇咽靈藥吸雲漿太上鎮之是以留也十五中毒死又見昔青童曰天台茅君飛印印腹其始殊悶絕良久豁如師以靈應感

通殊尤若此遂乃杖策遊諸名山遠訪茅君而遇嶽骨上起目瞳正方冰雪綽約嫵焉微笑曰爾來乎爾名已登仙格身逢魔試故此相救宜勉之當以輔教爲意無汲汲于去來由是更于青城趙元陽受遁甲步元之術于嵩高韋善俊傳八史雲躋之道宴息于栢蒼羅浮往還於蓬萊方丈靈圖秘訣仙符真度寶籙生券冥感空遊迨及三年人以爲溺及還問其故則曰一童子引或飛步火房或刮腹滌腸勿藥自復或剗腸刮膜投符有加或聚合毒味服之自若或徵召鬼物使之立至呵叱羣鬼奔走衆神若陪隸也故海內稱焉千轉萬變先朝寵焉一晝三接朕在籓邸

累聞道要及臨寓縣虛佇昌言奸臣寓謀凶醜潛迹未嘗不先事啓沃亟申幽贊故特加紫綬以大公侯之門而確固黃中不承軒冕之貴可謂德博而施道尊而光者也適來無迹爲夫子之時邇去無悵爲夫子之順歲在鶉尾月鶉火是時反真懸解翊日追贈越州都督踰月歸藏于栢蒼之山免朝章從其志也先生幼有奇質長標特操神照體外骨秀形表故萬先生目之曰子書成仙格方自仙宮吾將及爾爲同僚也信哉易曰君子或出或處出者無山林之逸處者無軒冕之貴雖道同則應而迹異難兼先生養神太和觀妙元牝君子或處之盛也金印襲貴紫綬方

來君子或出之盛也非夫道臻博大德合神明其孰能與
於此也故於王室則承恩者五代當朕時則傳道者數人
皆曰宗師無間然矣夫爲文者紀其實稱德者尙其訓先
生知余余甯不述試寓言而無愧可披文而相質銘曰忽
然勃然莫不出焉油然瀏然莫不入焉百昌之源萬化之
泉于此觀妙實云列仙列仙伊何銷化却老觀妙伊何豈
假至道旁通幽贊神變靈造滌祠厲堵無隱不討討逆輔
順功就佐時藏往察微業與神奇章綬加等方來不欺視
緣若遺恍然我思大有元吉黃中通理默仙委蛻元達無
已葉縣鳧飛遼城鶴止元風盛烈鬱乎千祀開元二十七

松陽縣志

卷三

金石

碑文

二二八

年歲在己卯爲葉仙卿作

范石湖書通濟堰碑

宋乾道五年

范成大

據拓本下列錄入碑之高廣不計
文凡十四行行書徑一寸五分

通濟堰合松陽遂昌兩谿之水引而東
行環數十百里漑田廣遠有聲名

浙東按長老之記以爲蕭梁氏時詹

南二司馬所作至

宋中興乾道戊子垂千歲矣往迹蕪

廢中下源尤甚明年春郡守吳人范成

大與軍事判官蘭陵人張澈始修復之

事悉具新規三月工徒告休成大馳至斗
門落成于司馬之廟竊悲夫水無常

性土亦善堙修復之甚難而潰塞之實

易惟後之人與我同志嗣而葺之將

有攷於斯今故列其規於石以告四月

十九日左奉議郎權發遣處州軍州主管

學事兼管內勸農事范成大書

右宋郡守范公成大通濟堰記并堰規二十條乾道四
年頒發五年張澈立石郡志僅錄記略又脫去六十八
字今摹石刻始全然規石雖存字迹模糊難辨今取相

松陽縣志

卷三

金石

碑文

二一九

傳堰誌一書錄之原刻尙有堰山一條共二十條此止
十九條據堰志云堰規凡二十條今除去堰山一條蓋
舊堰自春初起工用木篠築成堰堤取材於山欄水入
堰自開禧元年郡人參政何澹築成石堤以圖久遠不
費修築因請於有司給此山今山爲何氏物業非堰山
矣是則何氏因捐築石堤後據山爲已有遂除去堰山
一條而石刻上本有堰山一條字旣剝落無從取證亦
仍堰志之舊存十九條矣竊謂通濟堰漑田二千頃爲
麗邑水利之最大者范公規條百世遵守可也郡志錄
其記而遺其規未免輕重失宜余所以急取堰志補之

以還其舊堰志向有刻本自宋元來流藏民間致有增減錯譌人人聚訟明萬歷三十六年麗宰樊良樞又定新規八條重刻是書官弄頒行使知同文與民相誓後有私意增減者天神共鑒亦可謂盡心民事矣今明刻亦不可得止有抄本流傳人亦罕見余從府房存案中借閱之安得守土君子取范樊二公規條并歷代修堰事宜及宋元國朝諸記再付剞劂以垂永遠豈非不朽盛事哉

栝蒼山峻而源促土瘠而涸易田藉灌漑而有成水非激捍而不入故麗水之堰不一惟西之通濟水利最大

松陽縣志

卷三

金石

碑文

四十

始創於梁天監至宋明道元祐政和紹興屢皆修築然未立規條不無旋葺旋廢之虞至乾道石湖范公來守是郡與判官蘭陵張澈謀修復之并刻規立石以告來者後之濬污通塞實賴其法迄今六百七十餘年碑石剝落文字闕湛幸記言十四行文字較大鐫刻稍深尙可臆擬之亦栝蒼文獻之可徵信者也按宋史石湖官處州每多善政如剡義役隨家貧富輸金買田次第甲乙助當役者至二十年民以爲便詔頒其法於諸路志皆不書是可援史以補志缺又云梁天監中詹南二司馬於松陽遂昌之間作通濟堰激溪水四十里漑田二

十萬畝今考通濟堰在松陽麗水之間則史謂松遂之間者誤矣碑云水環數十百里則史謂激溪水四十里者亦誤據此皆可證史之誤又云成大為訪故迹疊石築防置隄閘四十九所立上中下水則溉灌有序民食其利而堰規不言四十九閘則史較詳也夫世知石湖善文而不知石湖亦善書今觀是碑文意該簡書逼蘇黃雖吉光片羽誠足寶貴

雲舫

案通濟堰因灌溉麗水西鄉之田而設雖為麗水所管轄而堰基實在松陽二十六都界內堰頭莊之上故凡有碑記悉收入松志非掠美也

高煥然註

松陽縣志

卷三

金石

碑文

四一

鄭國公何德揚神道殘碑

宋淳熙六年

闕名

碑已缺泐不計高廣

□□□□□□□□平令事贈太師鄭國□公神道碑

中大夫提舉隆興府玉隆萬壽宮歸安
下缺

敷文閣學士通議大夫提舉隆興府玉

隆萬壽宮

下缺

篆蓋

缺規恢復讎志方銳用事者憚虜虛聲撤海泗唐鄧戍遂啟戎心是冬虜復大入寇
缺下 匈咸切齒御史尹穡素附會□□惡□□□大夫公論益□於是
缺下

○犯○
秀安僖王下字奮然曰人情如此國勢如此身朝列逢明主可嘿乎遂上封事累數○言○數迷國罔上者罪且曰延醫治疾疾益○醫當遣疾缺賞姦何以○願請尙方劍斷姦臣頸死不恨 上感悟卽罷稽會太學生扣闈上書大指與公同執政激怒 上謂公曩久在成均○實倡導上察其○不○動公○
祠○是時朝野皆壯公節初紹興權相妒忌鍵塞言路踰二十年 高宗更化○孝宗初政始開通下情作成士氣然風俗頹靡未○
臣獻納○職○
無缺下奉常博士抗大義排論當權言人所難 聖明采納公志伸矣名高矣而媚嫉隨之後雖起松陽縣志

卷三

金石

碑文

四二一

用不過外

缺

持麾節使當時不出位而言公論○責也○

除○遷

缺下

計哉不于其身于其子天之報施亦明矣公

字德揚世爲龍泉人曾大父君平贈太師冀國公大父

缺

下卽江淮等路發運司主管文字贈太保

缺下

郎贈太師

昌國公天姿穎拔弱冠以文贄石林葉公公奇之待以國

器有書公文卷詩曰何郎壯

缺下

無此○
祝缺下公

公撤見所著述謂必遠到遂以齊國歸焉 中興新太學

遴選髦士公食其○月書季考慮占魁缺舉子○
優

○
選擢○
進士甲缺下爲詳定一○

○所刪定○
赴省罷改太學博士 孝宗受 詔百官

□陳樊事公請缺風俗舉□□定缺下隆興元年□□□

博士明年缺下四行 提舉福建常平茶事閩人知公治莆

政缺過而篤於信義聞善則服與公游者敬而□之調人

急死□親疎缺下薄喜從方外養性絕粒若無意於世者

初公馳聲上庠□學能文□黃缺下守泉以□□志趣詩

筒往來無虛月字畫遒勁兼晉唐□筆法得者藏弄為榮

不治生產缺下校中秘兼史館□□公既負□□□□

□□維緇衣美為薦紳盛事天顧裔□壽年僅五十八階

缺下觀文登近再為中執法參大□□樞筦臨明福大藩

典司留鑰顓江淮大制閩□與迎養孫曾滿前歷封齊缺

松陽縣志 卷三 金石 碑文 四三一

下觀文而□太夫□以儉勤起家以嚴慈訓子享福壽之

備也太夫人歸鄭□年未笄姑燕國章夫人治家嚴整缺

下學□太夫人整□□□費及後居間樂施又能曲成

厥志□□語太夫人若先吾死當誌汝三事奉姑如古

賢婦吾久困不缺下賙聞者□息□文缺下以情寬貸太

夫人喜見顏面繩治□□戒曰勿為已甚年齡益高躬自

補紉或勸毋自苦答曰人生在缺下朝廷表于宗族鄉閭

積厚流光宜哉鄭公之薨也以淳熙五年正月甲寅其葬

也以六年二月壬寅□兆□□□年缺下薨于□□□

□□□辛酉附鄭公兆子三人澹觀文殿學士金紫光祿

大夫知建康府江南東路安撫使兼□行宮留□江淮制
軍大使缺下女二人長適宣教郎新知嚴州建德縣潘檜

次適通直郎知婺州金華縣鄭如岡孫男六人處德承務

郎監温州□□商稅處仁缺下處禮奉議新□南東路安

撫司主管機宜文字處智承事郎監嘉興府糴納倉處□

承事郎新□臨安府新缺下安□桂店□□□曾孫男

女八人宗房承務郎何氏慶未艾也齊國華踰年觀文□

思表隧不敢以蕪陋固辭缺下何望縉雲世有顯人□

以綿宗 儒焉奮身 表表鄭公 有學有文 而又有

才 □然軼羣 隆乾盛際 缺下 □章婁貢 □龍領

松陽縣志  卷三 金石 碑文 四四

□ 請尙方劍 動悟帝宸 名以言高 位以言屯

詔俾來朝 缺下

□□南閩 □□上袞 沒有追□ □□賢祠 為今

良臣 握樞制閫 勞烈著聞 承□□□ 缺下榮始

哀終 莫與匹倫 厚積豐報 施于仍昆 堰山之原

□□其墳 缺下

太師鄭國公神道碑在堰山敲火礪角之餘所存字句

僅得其半矣文中有公字德揚世為龍泉人曾大父君

平云云按君平字少嚴為清源郡王何伯通執中之父

德揚乃何偁字為參政何澹之父然則此為偁神道碑

無疑矣觀其上封事數御史尹穡罪至欲請尙方劍以斷其頭骨鯁如此何不幸而不與胡忠簡並傳史冊也然六百餘年後尙有訪片石於荒烟蔓草之間摩挲而起敬者猶不幸中之幸也

雲舫

按是爲鄭國公何德揚神道碑後叙子姓云子三人澹觀文殿學士云云考澹實爲德揚繼子後德揚自生子二人澹不歸宗周密齊東野語云何澹本何侑之子其母姚氏死卽出繼何侑後侑再娶周氏及澹爲中司日周氏死澹以不逮事母審合解官申心喪下禮官議未定後書庫官方庭堅於隋書劉子翊傳據禮詳辨灑灑

松陽縣志

卷三

金石

碑文

四五

數百言并云不可使出後之子無情於本生名義之分有污於風俗上之議乃定澹去官又碑銘有堰山之原句足證何侑坟墓在堰山攷范石湖太守定堰規二十條內堰山一條缺去據堰志云舊堰用木篠自郡人參政何澹築成石堤請於有司給此山爲何氏物業非堰山矣參觀此銘豈因澹取爲墳墓故有石隄之築不盡爲民起見歟

松陽縣進士題名碑

宋淳祐八年

馬光祖

碑高八尺五寸闊四尺行書文二十五行行十六字正書徑一寸篆額八字長四寸陽文

松陽縣進士題名式

松陽介于栝蒼之

南羣山森秀如

列障

如

倚屏清淑之英

造化磅

礪父子世

科勳

著

方面持橐論

思

兄弟

蟬聯

迭將

使指以儒飾吏者皆邑人之傑也

文擅當

時紬書

東觀好

古博雅耆艾

不衰又

今之巨擘焉十數年來氣數尤盛

春

官得雋舉不乏人

淳

祐七年秋葉君茂

洪繇

太學擢第

歸

閩里榮之令長會稽高君彭盍朋簪于鄉校舉觴相屬為

志其榮而題名之石適無遺刻廼確堅氓以續前紀謂余

嘗假守是邦移書來諭俾記其顛余復書曰牙籤汗青厲

志研精詞場擷英龍梭震霆劃然飛騰父老歡迎喜溢謝

庭世以為榮者其不在茲乎余觀先正鉅公褒然為舉首

松陽縣志

卷三

金石

碑文

四六

人語以喫着不盡則曰志不在温飽惟其抱負者遠大故

所植立光明俊偉至今望之若神人然士生天地間任重

道遠豈獨榮其身而已崑崙濫觴益濬其源豫章拱把益

培其根渟深蓄茂日肆以宏用之則行發為事業使天下

誦其人而紀其州邑夫豈一時榮乎哉余外氏家古松故

於松士拳拳焉山川炳靈人物秀發當有名斯世而光前

哲者矣賢令君試以余言質之曰然則勒諸石淳祐戊申

仲春朝議大夫直徽猷閣主管建康府崇禧觀東陽馬光

祖記

以上第一層

葉茂洪 □□□□曾伯
祖循祖 □□□

寶祐改元

項汝明 □□賦魁癸丑姚
榜會叔祖得一

潘鳳 元名大方入太學癸丑姚
高祖宗回伯祖克和

景憲景愈伯自厚叔自牧

沈昉 寶祐四年丙辰文榜
六世祖文通皇祐榜

眼高祖晦宣和狀元

潘仕林 景定二年壬戌科
方山京榜

潘夢午 景定二年壬戌科
方山京榜

葉埜 咸淳元年乙丑科
阮登炳榜

松陽縣志 卷三 金石 碑文 四七

葉霆發 咸淳七年辛未科
張鎮孫榜

葉桂錫 咸淳七年辛未科
張鎮孫榜

皇明進士

周月華 洪武十八年乙丑科丁
顯榜族孫同倫輅翱

俱舉人

盧璣 天順八年甲申科彭教榜大明一統
賦曰僧道巫祝尼媪之類為異端經

有明訓律有明條進士盧璣建言申
明之榜示天下此我朝之韓愈也

詹雨 成化二年丙戌科羅倫
榜父景威舉人弟寶進

士

以上第二層

詹寶□□治□年丙辰科□□□□□□□□□□

下缺

松陽明倫堂有碑在埃塵中拂拭讀之係元復頴地記復視碑陰為宋進士題名記爰並搨之題名碑分列四層上列馬光祖記前數行剝蝕不可讀以松陽志校之補錄闕文於旁藉志以知碑缺者二十七字據碑以正志悞者十有三字誤字如碑飾字志作飭珉作砥紀作記顛誤作端龍校震霆句逸獨作特斯世作斯石葉茂洪作茂宏潘仕林作自林之類皆志誤也次層乃進士題名宋九人明三人第三層僅明一人而已按篆額稱

松陽縣志

卷三

金石

碑文

四八

進士題名式文云題名之石適無遺刻乃礮堅坻以續前紀則是碑之前尚有第一石已無存據志所載松陽宋進士尚有六十四人殆具載前石耳當時既立此石然有題有不題者如葉茂洪之下尚有葉隆禮咸淳乙丑有趙必瞻蕭必強二人元有練魯周梓二人明洪武辛亥科有王夢龍處州府志作文龍建文庚辰科有王遂永樂丙辰有劉性同府志麗水人嘉靖庚戌科有毛文邦九人皆不與題名并錄此以俟考者雲舫

李金瀾曰余於丁酉冬攝松陽學篆同王雲舫搜得是碑於明倫堂之東壁已屬雲舫照松陽志一一考證之

松陽向有題名碑無續之者是時因葉茂洪由太學擢第歸令長高彭續爲之轉請前假守馬光祖爲之記馬公不獨文推作手卽其記中所云崑崙濫觴益濬其源豫章拱把益培其根方不愧任重道遠云云議論宏遠足以砥礪末俗矣

治平禪寺記

宋 王安國 臨川

據舊志錄入碑之高廣行數不計

處州之松陽資聖寺距縣郭西一里矗然見於山林之間而溪落其前出入甌閩者由之取道而禱祠觀遊者無時而不集實爲一邑賓客之輳太宗出御書真宗出芝草使

松陽縣志

卷三

金石

碑文

四九

藏其中而仁宗又出御書其來久矣英宗卽位之初詔天下寺觀無籍而額不出於朝廷者聽州縣條上特賜以名於是始被詔用治平之紀元以易其額而歲度學者一人父老相與語曰吾邑之遠而四朝寵錫實爲盛事且吳越之俗鼓舞佛法者固不迫於號令而樂致其力吾聞五代之時黎民愁歎於征戍調發之勤迄我朝始合正朔於一而百年之中養生送死於無事之際退而思前人值其不幸之時而我得不自幸耶且聞佛法有因緣之理苟貪今日之福而不知福之所以植庇上之德而不知德之所以報泯然待終而爲後世之因緣者尙何恃也道甯乃輸錢

於印經之院售五千四十八卷歸之寺又合福之錢萬一
千有奇屬弟道隆者使作轉輪之藏有殿有堂列以兩廡
又命僧省文丐佛像六十而工以期年而就噫何其盛也
世之儒者以百氏出於道術散裂之餘而佛尤後出自西
域數譯而至中國上古之人不道也詩書無有也遂肆意
詆斥以爲與楊墨申韓等爲詭駁之說雖然楊墨申韓能
行於一時而終無抗儒者之辨獨佛法之旋廢旋興而山
海荒忽之俗聞佛則瞻仰贊歎與儒者竝出而牢不可壞
者豈非其道神妙得於人心之自然耶故雖不遠萬里迹
絕形殊其言不可算數而理則一也彼以上古詩書求之

松陽縣志

卷三

金石

碑文

五十

者特見其粗耳孰知其精之在人而不自悟耶方其因歸
依之感於外而使人之內有以發其信心則侈其事以報
之奚曰不宜同郡國子監直講龔原深之吾游之賢者也
語其寺如此而乞余文揭之碑遂爲之書

邑令赤蓋公方公去思碑

元至正

年
余伯野

據舊志錄入碑之
高廣行數不計

王者制土邑方百里設宰守之所以字民也宰有賢否故
民之休戚不同愛憎亦異子賤宰單父魯恭宰中牟皆務
以德化民民到於今思之理固然也至正甲申予來松邑
宋廣西提刑程公會孫燈德明偕邑之耆耄賢士來請曰

松自元混一以來距今七十餘年歷宰凡幾仕能上承朝廷之意爲意下以斯民之心爲心前有赤蓋公後有方公二人而已赤蓋公字遂良東平人大德初由閩海道肅政廉訪司經歷來尹茲邑威凜秋霜惠和春風明竝星鑑操比冰蘖奸吏束手豪宗側目民訟自息縣署肅然曩時版籍墜失疆畝莫考吏緣爲奸富强務爲規避貧弱惟其征徭里胥代償因茲鬻產十室九空公廉知之多方設法躬親履畝務覈其實遴選鄉都之耆德證諸異代之圖籍不踰半載事已就緒額弗官虧賦不民病又有係官土田名存實亡佃者苦之逃散流亡莫可勝數公爲蠲減親詣丞

松陽縣志

卷三

金石

碑文

五十一

相府得請民始復業知有生之樂歲旱公禱請山桑神祠矢之曰三日不雨則毀廟雨則葺公還甘澤隨澍歲以大稔蓋其素行足以格乎神明方公名明安字泳道會稽人元統間由金鑾侍直出宰於斯端莊儒雅舉動由禮廉明竝蓄寬猛兼濟訟簡刑清吏民畏服不言而化先時邏卒郵兵易置不時吏以爲市民田破業公一筆不置縣之伯役悉仍舊實吏卒輩鄉無一跡雞犬不驚咸賴以甯尤留心學校朔望必躬親聽講課諸生以詩文中者旌賞之公餘則偕僚屬暨邑俊髦赴學賦詩彈琴士莫不翕然舍利趨義至今表表可稱者悉公之勉勵也學旁餘址淪於居

民歲久莫復公一言民以侵疆來歸蓋其忠信明決素孚於人也二公襲芳聯美輝映後先他蹟未可殫舉深仁遺愛及我松人我松人至今賴之官則敬去則思然弗刻諸石何以昭令德垂永久歟予盍爲我歌之予曰赤盞公去茲已四十餘年方公亦十餘稔民猶陶然歌咏思慕之非其惠之及人也深安得民思之也久如此可謂有古之遺愛焉德明謹愿自守之士不趨利不榮勢乃獨爲二賢令捐帑樹碑非誠有感於心其能然乎茲豈不足爲來者勸使後宰邑者能繼美前政又當有記之者矣予旣嘉二賢令能得民又嘉德明之好義遂道思者之心作歌以泄之歌曰松之水兮泚泚松之民兮濟濟公之來兮旣父其父又子其子歛此大惠兮曷其有已我田我疇兮我耘我耔吏無囂突兮閭里熙熙我公之去兮誰其嗣之我民之鰥兮我民之嫠歲之不易兮逢此饑饉我公之去兮吾將疇依公之來兮我日以娛公之去兮我痛切膚何不重來兮使我其蘇

邑令買住公去思碑

元至正六年

劉基

據舊志錄入碑之高廣行數不計

松陽民金文俊致其父老之言走郡請曰邑長買住公治吾邑六年有善政今秩滿而去矣吾民不能忘願得文以

記伯溫辭不獲則詢治狀曰公爲政以愛民爲先以廉潔爲本其始至也復金梁堰以灌民田民受其利歌之曰閔閔汗萊我畚我菑堰流以漑有堤相之積潦肆囓堤圯赴壑究其原田白石鑿鑿公來相攸負鍾商功陰洩陽瀦歲則屢豐旣而民以食鹽爲苦公請於運司復舊額民又頌曰鹽筴僅止我則弗勝來者繩繩會莫我矜公獨我恤曰鹽不可增義氣橫出慨然爭承我實賴之犁耕軸鳴日用飲食企其有成其修學宮也士頌之曰桓桓學宮教化所基支傾柱敗孰振前規顯允進士職是縣長載葺載完有教有養理其田疆輯其租逋惠我多士矜佩來趨予曰美

哉願悉數之曰縣役舊弗均無教條繩墨歲點差吏得爲奸公閱前政簿帳按成式隨民力所至高下使自承民均其平而賦役用均縣民素好訟公以明察洞其情僞事曲直立判亦嬰節解民各自戢而詞訟用簡勸農桑課樹蓄使皆力本務實効故荒墾沃耕田野用闢他邑民或致魚鹽貨物居縣廛而鄉村之民無帶牛佩犢之風勤於勞來而戶口以增謹於關譏而盜賊自息行省掄公廉幹以海舶事委公之朝陽數月縣中訟梃牘稽公歸悉爲疏決吏民益服浙東憲僉瑣主公按郡至縣得公治蹟薦之已而索公行部復廉察之交剡上臺今去我將羽儀天朝是不

可不識其思也余曰美哉邑長之政固善矣若父老不忘其善能致其去後之思亦善也語曰斯民也三代之所以直道而行有循良之政使得相安於田里則所以滲漉乎其心者自有以使人不忘如是也然漢傳循吏六人班固稱其所居民富所去見思然皆二千石守相唐世縣令若韋景俊何易于等徃徃始得列是傳然大要以惠利在民不忘者預焉今買住公去而見思其正所謂古循良者歟因作詩卑其父老且以續夫士民之所未誦者公字從道唐兀氏世居廣平由進士出身故知愛民之方而民亦不忘之如此詩曰民產有恒役則罕均何以均之曰義以使

民情好惡譁訐以刃何以理之曰明德知本迤邐阡陌莘莘禾麻民用胥勤力及荒畚受塵爲氓旅塗任載蒼蒼崔將夜寂厖吠治無大小學道愛人已惟冰蘖民則陽春車聲麟麟轅攀轍卧去者之思用勗來者善達而思天下之兼甯獨爾思一邑是奄蟾峯秋高明月千里甘棠蔽芾柏臺森峙至正六年正月記

重修通濟堰碑

元至順二年

葉現

碑高七尺廣四尺記二十一
行行三十字行書徑一寸

重修通濟堰記

栝蒼山郡也南其畝者界乎溪山之間無深坡大澤以禦

早古之人作爲隄堰渠圳以限水盈則放而注諸海涸則引而灌諸田故力農之家無桔槔之勞浸淫之患枯蒼七縣皆有堰惟通濟一堰灌麗水西鄉之田爲最廣在昔蕭梁時司馬詹南二公相土之宜截水爲堰架石爲門引松陽遂昌之水入于渠圳中分爲槩暢爲枝旁通爲葉穴葛延周遭百有餘里溉田廿萬畝有畸宋乾道間郡守范公奉議克復是堰以田戶分爲三源鳩工有規度程有法凡啟閉出內之限靡不詳刊于石歲久事弊堰首易如傳舍昔之冗者湮築者潰由是下源之民爭升斗之水者不啻如較錙銖郡守雖嘗展力修治而堰首吝以已私漫不加

意至順辛未春 部使者中順公按行栝郡諏咨農事覽茲堰之將隳迺諭于眾曰是堰之作幾數百年矣茲而不復農功益艱於是郡長中大夫也先不花公郡守大中大夫三不都公皆相率承公意命邑宰卞瑄承務實董其役度土功慮財用揣高口討尋尺斬穢除隘樹堅塞完數日之間百廢具舉枯之耆老有曰昔鄭公作渠秦民以富白公繼之漢賦以饒今 中順公復通濟之堰得非古之鄭白者與咸願勒石紀功以垂不朽現歸耕田里聞公偉政故樂爲之書公名幹羅思字謙齋高昌人廉明著績累居風憲憲史古相王宗善鎮陽魏楨濟甯劉鎮皆文士也實

贊其事焉是歲二月既望將仕郎前温州路瑞安州判官
葉現記并書中議大夫前處州路總管兼管內勸農事月
忽難篆額宣武將軍同知處州路總管府事八哈瓦丁承
務郎處州路總管府治中怯台承直郎處州路總管府判
官武居禮承德郎處州路總管府推官張駟承務郎處州
路總管府經歷田幹等立石戶曹掾天台陳應潤督程孫
宗年梁與可鐫鄉農葉慧清□□

右元重修通濟堰記作記并書者葉現也篆額者月忽
難也重修通濟者部使者中順公也中順公名幹羅思
字謙齋高昌人案郡志記通濟堰事在宋錄二篇一關

松陽縣志

卷三

金石

碑文

五五六

景暉詹南二司馬廟記一范成大自作通濟堰記略以
下直接明記六篇元無存焉余屬芝庭親赴堰頭搜尋
古刻得葉現此記竊謂元祚雖淺然百年中豈無有留
心民瘼者闕而不書未免疏矣此余所以輯金石志以
補志乘之所不備爾又案通濟堰誌於宋尙有乾道四
年葉份記邑宰王禔修造石堰事紹興八年趙學老題
堰規碑陰於元至正甲申項棣孫記邑尹梁順修石堰
事今石刻無存郡志俱失錄姑附見於此後之修志者
當取堰志所有補之

儒學復泮地碑

碑高廣見進士題名碑篆額九字長三寸五分文
及首尾共十七行行四十一字行書一寸五分

松陽縣儒學復頌地記

前鄉貢進士明善書院山長陶澤撰

承事郎慶元路同知奉化州事項棣孫書

嘉議大夫處州路總管兼管內勸農事盧景篆蓋

元統改元之明年縣尹方侯實蒞茲邑人和政修百廢具
興乃冬十月朔侯入學宮顧瞻門巷隘甚喟然作曰古者
諸侯有泮宮政教之所出也邑視地百里亦古建國何隘
陋若是教諭余申孫進曰直學宮盡故學地淪胥爲民居
幾六十年不可卒奪侯曰嘻近聖人之居其可以若是越

三日居人撤墻屋除壇場復侵域以俟東西若干步南北
若干步截然方正侯至而喜曰能若是亦可以爲義民矣
於是疏爲淪漣樹之松篁繚以周墻夾之靈星而泮宮之
制以備在昔夾谷之會齊人來歸鄆謹龜陰田書法與濟
西田汶陽田特異謂夫心悅而來歸非力邀而強致之也
方侯讀聖人之書其亦得夫感化之妙也哉嗣是而葺倫
堂興兩廡置庖湣具祭器黝堊丹漆煥然一新迺延師儒
乃集學徒彈琴賦詩日講月試凡學政之所當舉者莫不
備至人喑喑稱曰縣入國朝得賢尹自赤盞君以下惟侯
一人太史公傳循吏漢無一人與而松陽蕞爾邑得二賢

令於明時茲固不能數也古循吏如公孫僑夫子稱其使民義謂都鄙有章田有封洫之類今方侯能以義使民而其民能以義讓地是皆可書余君泊縣幕僚鄭君偉懼其久而復湮也請刻諸石而且以爲來者勸侯名明安字詠道會稽諸暨人至元二年秋七月旣望記承務郎松陽縣達魯花赤兼勸農事伯咬兀哈進校尉松陽縣主簿禱刺沙松陽縣尉張良臣典史鄭偉教諭余申孫訓導葉詒孫且沐徐老孫立石邑人陳仲方刊

右松陽縣學復泮地碑文章古茂書法出北海而柔媚處絕似鷗波所謂剛健含婀娜也惜石理粗頑鑄工稍

拙陶澤爲明善山長志誤爲教諭縣尉張良臣誤入典史列余申孫教諭誤爲訓導皆可援碑以正志

雲舫

按是碑是松陽學明倫堂一面宋刻題名余與雲舫搜得之碑云元統改元之明年縣尹方侯實蒞茲邑爲元順帝卽位之二年歲在甲戌元政從此日替方侯下車之始孳孳以振興學校爲急可謂賢矣撰文書丹皆不苟此元碑之最出色者

謹按記言赤盞君以下惟侯一人攷郡志赤盞顯忠是也官承事郎元貞二年令松陽尹到任閱兩月卽重建文廟學堂齋廡廚廩煥然一新學士張伯淳爲之記未

及代除簡較杭州監事士民立石去思方明安由金鑾
侍直出宰邑舉動以禮寬猛兼濟吏民服誠懷德附頌
於赤盞去思碑陶澤爲教諭張良臣入典史均是志誤
余申孫志本作教諭並未列入訓導葉詒孫訓導志作
教諭誤原本雲舫跋考據似近涉獵爰記之

殷甫

邑令石公平賦役碑記

明洪武

齊志沖

據舊志錄入碑之
高廣行數均不計

昔子貢爲信陽孔子告以治官莫若平臨財莫若廉平則
不失人心廉則不撓吾政後世一民之効有不出於此者
哉三代以前賦輕役簡無甚富甚貧之家自徹法廢田爲

松陽縣志

卷三

金石

碑文

五九

世業因得交易而奸巧生焉官知其戶賦多寡不知其盈
虛消長有無之實詭冒隱寄產去戶存一有征誅則上下
不勝其煩擾爲弊久矣關國之初濮陽石侯知松陽軍給
鼓沓箠楚集事不試責成小有愆期黜罰立至雖智者不
能善其後乃與幕僚楊椿謀以賦役之利聞於上察吏之
介而能者得葉正典其事擇善書計者得劉信吳成毛欽
分任之明法審令以布於民使履畝較籍稽實蠲虛交糾
疎失寬以致其詳罰以懲其怠務盡其情人不敢欺歷三
年始得序次如魚鱗焉於時浙東省中胡公總制郡事明
敏果斷方欲考所宜罷行者以新政治侯遂疏其所陳一

一不泥於古而宜於今不刻削於貧弱而任均於大小綱
張目舉利害顯然一見意合俾得從容詳定於是民業有
常公取有法執役有次號令之下歡呼畢來蓋昔之等第
不實今則計畝均輸矣昔之輕重不齊今則因賦受役矣
昔之怙強制弱使不敢伸一喙今則弱者任小矣昔之田
入外縣民差役不能及今則分其田租以助役昔之戶號
大家者分支有厚薄或培克歲增或窘困以存今則析輸
聽差私不稱屈公不廢事其爲便者如此父老咸曰侯之
政蹟莫大於賦役惠我後生而無以表於康衢亦我父兄
之過也因屬事於志冲誼不可辭乃告之曰凡言人善徵

諸事則信來世今侯能平其政德於爾民爾不知政平由
廉於已故臨事無有趨趨不能決者殆孔子告子貢之語
而侯得其道耳自經兵火以來民不聊生乃有貪殘者出
其間陸其人罄其室以殍其命卒至於無民不可爲都邑
使沃壤之地荆棘灌莽爲虫獸所居動數百里哀哉苟盡
得廉平之吏布於四方則豈無久之之術然則侯之德不
可以不紀乃作詩以存其思云繫鄭之僑爲政有經民初
不便孰究其成在位三年藹然頌聲石侯之來倣古有作
標潔冰霜與善疾惡恩威兩加默符巨護維時軍興徵給
浩煩竭民財力刮蘆敢誼煦之嫗之撫疲保存賦旣加倍

役莫勝任慮平罔怨庶攄其困戶分籍之失相披攜逃匿
出古攤虛除盡贊畫有方不亟不徐公以生明敢篋其胙
嗟爾父老涵濡恩澤戢戈橐弓卽獲蘇息願昌侯家用嗣
清白

玉巖白雲道院重修碑

明洪武六年

齊志沖

據裝本編入不
計高廣行數

白雲道院重修碑誌

松陽爲松州之地漢時屬會稽郡故山水之秀名於天下
其西爲玉巖者發隴於平昌最遠依西而左行延蔓廻顧
其變態不一右則峯巒疊出以繞巖前斷而復起如虎伏

松陽縣志

卷三

金石

碑文

六一

者曰屏山屏山之巔爲白雲道院有元之元貞乙未里之
葉氏始建至泰定甲子劉氏創上真殿以接其山次年葉
氏移其法堂於殿前創兩行廊各有樓山門三間則潘氏
之力所建仍改至元之庚辰年間一都劉紫虛素好道檀
越遂請焚修太純以其父年老隨侍以來是年夏間洪水
蕩折旣而修理完有周雲谷募緣油飾煥然一新矣元之
季山寇起遂毀其窗戶板壁弊漏殆甚過者雖傷之卒無
能起其廢也太純念產業素少雖竭其努亦不足用必大
募衆力方可以施展而改爲之遂執疏首干檀越與大家
次及中戶下戶慨然看筆捐金各有高下於是召工師求

大材木陶瓦治磚百用俱備以洪武五年十二月乙亥鳩工治事以帝宮狹小改作重屋上以奉三清內以安元帝則有事庶可展其禮左爲真人宮右作三官殿其舊法堂改爲七間使內外相稱簷牙翬飛上齊岡隴瓊窗雕欄下臨階屺其廊樓門屋損者更之缺者補之必使如初而後已法堂之左復作清隱軒以面玉巖池沼交通青白相照可以待來遊之士凡歷二年工役未畢落成之後尙欲求田入院以爲先人追忌之費此志素定次第爲之噫世之人立業以傳後而子孫有不能爲之守則視太純之建事功實可以驚流俗名傳不朽矣志冲嘗以文會相聚一年

每言其志予以人方窘於徵役或遇年不順或慮其落落難合今則經營輪奐既已如此則未來所思符其成算可必矣故爲書諸石以勸有爲者時洪武六年癸丑之歲十一月乙亥前鄉進士齊志冲誌葉蒙書

重興普圓寺碑記

明洪武十四年

齊志冲

碑高五尺六寸廣二尺五寸文二十行行三十三字行書徑八分篆額六字徑三寸

重興普圓寺碑額

普圓寺重興之碑

題

將仕郎處州府松陽縣丞蘇克忠篆額

比丘尼善應父家爲舊市之葉居明善書院前街之右元之至正十三年齊志冲來長院事因得與其夫劉景用合

席懽飲數矣。□數年劉郎喪卒無子葉氏年亦三十有四因發願爲尼入水南普圓寺禮志堅鐵山和尚爲師得心法持清淨身以焚修香火首創土祠三間四面築墻圍行植花菓行道階級皆治使端正繼起從屋以待來遊輩甲辰年募緣塑佛五尊皆西番相渾金粧嚴併采飾內外歷洪武改元之後工役猶未畢四年辛亥建山門癸丑年再建廚屋三間戊午年整法堂地己未年重建佛殿。□寺之初將己身供養田六十餘鄉碩與常住田若干劉宅葉氏德惠。□忌田若干總。□歲收租若干以爲起造費及當差輸納與供養器皿之用雖有。□幹能支持門戶者不能無

窘乏之憂善應乃能攻苦食淡勤勞所事以立功業使其法門旣興無廢。□。□人謂之女丈夫非乎今又指取材木。□注便地擬以明年之吉立三門蓋行廊九間已與梓人定其方面丈尺之數遂術其已作與所未立之狀請予爲記使繼之者知成之不易思方略爲持久之規庶幾不負上下之敬信云今按是寺起於宋甯宗嘉定十六年歲在癸未比丘尼妙楚開山建佛殿爲廊房歲久圯壞元之至正八年戊子得善應重興之人以爲氣運循環無往不復。□事默符於天道其不可徵諸此乎今爲田一頃一十畝段落租數具刻碑陰徒弟李守節葉守成師姪守義守廉

磨石以待書丹洪武十四年辛酉四月之望前甲申科進士新安齊志冲記

法眷證聖寺住持比丘尼慧滿首座慧信

當山住持善應立石

妙勝院比丘士正書 宣鄉寶川徐彥中口

右碑民國五年丙辰春應龍偕古市諸君子遊正念寺

涉足園林得之寺右破屋中蘚蝕苔侵塵封埃積字跡漫漶不能遽辨亟爲剔除苔蘚拂拭塵埃隱隱有一二字可辨復用水沃巾揩始識爲元比丘尼善應重興普圓寺之碑按普圓寺古市隔溪後舖會爲新建殆卽善

應所重興之舊址歟惟善應迄今闕時五百餘歲物是人非無從深考天壤間豐碑巨碣或星霜剝落或風雨摧殘埋沒於長林豐草間如茲碑者何可勝道今是碑歷世幾更忽於無意中得之豈冥冥中亦有主之者乎爰語普圓寺經董昇歸原址以便保存并將碑文搨資志局俾便登載庶斯碑得垂永久而其人其寺亦得共垂不朽云民國十二年癸亥嘉平里人葉應龍謹跋

細閱碑搨書法秀潤雅近趙松雪萬象山崇福寺碑乃出自比丘之手亦足貴矣亟爲登載邑乘以供後之賞

鑑者

高煥然註

重修玉巖葉氏時思庵碑

明洪武二十年

練 魯

據裝本編入不計高廣行數

重修時思庵記

生人之道原始要終體魄歸於下土魂氣上遊而無不之古者遷葬竈穴封壤藏其魄也後世相率築宮封隧之側其子孫以時饗祀思其祖禰已萃其神而魂氣有所依歸者孝子之志也松陽葉氏居玉巖先世仕宋有大學論諱安禮與弟司錄諱安仁者以宋嘉定間葬其考妣於甸嶺復築宮以依神中爲祠宇前爲齋居右爲燕私之室祭田入祠匾曰時思以子孫遭元季喪亂燬於寇齋室僅存今

松陽縣志

卷三

金石

碑文

六五

洪武八年六世孫鎮謀於衆俾從弟善養鉞孫歲儲其租入掄材鳩工洪武十一年復起祠及燕室凡十餘年始落成祠宇廢而遄復垂二百餘年蓋其子姓能繼先志謹於孝思可以觀世德矣孝子之事親生則養歿則祭祭則觀其敬而時時以思以吾親之遺體陟降虛墓而彼體魄已歸下陰爲野土其能已於思乎然而君子非僅時而或思觀宇宙萬物之運化風霜雨露之往來必時感而思思其反本追始常怵然於中有慌惕悽愴之心然後有齋明精確之志以其有齋明精確然後將之以籩豆粢盛以與神明交神其饗之報之而百順至矣洪武廿二年春葉氏僉

議祠宇既復命僧本然者來主治之雲孫等懼其後棟宇或弛田地或湮封樹或隳而墜其先澤也礪石徵誌於魯敢述其先世志意以勗後之人凡追養繼孝思其本始者而敬慎之哉葉氏之先居舊市有諱渭叟者仕宋爲郡法曹以宋天聖二年徙居玉巖法曹延至評事郭郭生文成文成生淳淳仕至承節郎承節郎生天麟爲大學齋郎大學齋郎生堯咨爲致政郎配徐氏卽大學諭安禮之考妣也葉氏恐其宗本不明請詳著於石其祭田則條具於碑陰云大明洪武二十二年歲己巳春月吉日倅侗子練鹵誌裔孫善養書

松陽縣志

卷三

金石

碑文

六六

邑令魏良弼去思碑記

明嘉靖

應良

據舊志錄入碑之高廣行數不計

魏子之令松陽也其民親愛之如父母敬信之如神明既三年報政將如京師民戀戀然咨嗟涕洟而不忍也徬徨然憂其不復來控留而不能也於是學諭張君准司訓裴君耀葉君愷列狀遺其門生詹世用何寶遠數百里至仙居告於史氏應良曰松陽之政國朝百六十年魏明府一人而已不可以無記請公文之以諭來者垂不朽按狀魏子以嘉靖甲申夏至松省風俗詢察利病先後緩急漸次罷行洗濯刮磨與民更始嚴禁令曲撫諭囂訟游手偷兒

閭里之間皆屏息正版籍之欺隱以蘇下戶絕銀場之哨聚以遏亂源老弊巨蠹剗剔且盡凡諸廢墜罔不興修建浮橋以利徒涉築河堤田爲永利治教場列樹之桑尤留心學校修文廟飭門廡葺齋舍翔書樓濬泮池闢湫隘鑄祭器置書籍壇壝潔清禮祀秩然其待士也如其子弟困乏不振者周之婚葬不能舉者助之其教人也如其身本之於心身而貴力行先之以德行而後文藝松雖僻陋道化聿興萬民改觀士心益勸仁及旁邑赴愬日來善政纍纍未易縷書余亦嘗聞丙戌浙東之饑括盜尤橫非魏子折其萌芽延蔓且不止也夫魏子之政人可能也至其不

任才力不假權數道之以德非易能也松人德魏子而未知也知之或未悉也魏子學於陽明夫子而聞明德親民之說矣其體驗於身心講習於朋友亦久矣余曩在京師而友魏子見其與同鄉王公弼歐陽崇一同舉進士同志同道同邸舍思若兄弟尋各出爲州縣皆卓卓見諸實用而松陽尤號難治遺愛之深乃若是世之任才智以就事功者徃徃病講學於虛談而以王道不可復行於今孔子之教爲迂吁亦謬矣余於松陽之政見魏子能信其師說見魏子行其所學見王道之易易見聖人之教之非迂庸記之以慰松民之思且質諸世之仕學者魏子名良弼字

師說新建人

知縣楊維新置學田記

明隆慶

何鏜

郡人

據舊志錄入碑之高廣行數不計

丹徒楊侯以壬申中春來令松陽尤篤意人才以為學校者賢才所自出故枯蒼上游世有聞人而比來希闊豈必士人不振之過所以化導而惠養之未至耳乃親自飭勵選博士弟子之勤敏精進者羣什數人聚居邑中官舍時臨督視試其論著問所得失而誘進之旬給餐楮費月有獎賚歲察其貧窶不給者賑助之邑中人士靡然向風興於文學侯又以為人士緩急不得以時補助即高等者制

松陽縣志

卷三

金石

碑文

六八八

得廩膳殊不得溢額為惠不一創制之非永永利益計乃稽寺觀田自徵入義倉外得羨餘二百畝以十二畝為故邑令魏公祠守費共一百八十八畝請為學中租田又察得他旁寺田一十二畝亦羨額合前一百八十八畝仍二百畝令學中收入租穀視諸生貧不自給者壯不能婚者喪不能舉者咸以其等捐給之歲以為常議上御史府新建謝公報曰可其置田畝所在與徵給規則悉列之碑陰

廖侯興凌霄臺碑

明萬歷十九年

周大夏

碑高七尺六寸廣二尺五寸文二十六行行五十字正書徑一寸二分篆額八字徑六寸

廖侯興凌霄臺之記

賜進士第廣西按察司提學副李誌篆額

署理松陽縣儒學教諭事舉人林維熊書丹

□淮王府奉祠所奉祠正選貢周大夏撰文

郭外有山曰西屏以其居□□西屏列也屏之陽有治平古刹高敞雄麗爲習儀祝聖之所屏之陰則石崖壁立如削高廣各十餘尋中間平阿幾半畝許由曲徑而上可以恣登臨極眺望古以凌霄臺目之而大鐫其字於石壁間亦松陽之一偉觀也

廖侯蒞松□□政教大行神人胥悅每出郊省農必於斯而止焉偶一夕夢三佛像巋然坐巖石間咸相顧而與

松陽縣志

卷三

金石

碑文

六八九

之言若有所托覺而異之詰且視事適僧人清亮持疏叩庭下云居屏山北麓茲欲置蘭若於凌霄臺之上敢請命焉始悟其發夢之端與殆以神遇也遂命駕往視見其材具志堅欣然爲之相地度基經畫規制因捐俸金畀之於是耆民周體明承奉德意倡義施財令厥孫勝宗董其事而樂助者翕然於孟秋庚寅卽克就緒中爲堂三楹榜曰凌霄真境左右翼以兩閣東曰龍興以臺畔有石如龍鱗西曰鳳樓聞古有鳳凰棲於其地故以鳳臻名野蓋取其義也又於東偏築小室爲住守計侯乃撥逍遙觀田六畝與之俾朝夕得有所資可傳永久人之登斯臺也一望數

十餘里見萬山環翠四野呈輝雲霞縹緲禽鳥廻翔頓覺
身居物表廼僉以得民心致褒美而允所請有事於臺者
乃求紀其事於石余曰俞美哉侯之興斯臺也非獨以宗
釋教亦因以振文運也舊餞送應試士於郭外必於逍遙
觀之門今秋勸駕持盛舉於斯臺之上蓋以凌霄期之況
龍興鳳樓又騰蛟起鳳之兆其所以作興而屬望者何其
厚與民之謀立石者豈專事佛云乎哉蓋欲侯之爵位高
出雲霄之上於以攀龍鱗附鳳翼垂功名於竹帛而松人
之景仰輝光思慕德澤將與斯臺而並久也豈不周人之
睹甘棠而思召伯者乎侯諱性之字道夫別號畏齋以麟

經登魁薦出江右高安之望族云

萬曆十九年辛卯歲秋八月吉日

凌霄臺置田碑

明萬曆二十五年

毛復

碑高七尺七寸廣二尺三寸文二十二行行四十八字正書徑一寸篆額六字字徑六寸

凌霄臺置田記

凌霄臺卽西屏山也宋時有祖謙僧居焉蘇東坡公贈之
以詩云道人曉出西屏山來施茶典三昧手忽驚午□□
覺斑打破春甕鷺兒酒天台乳花世不見玉川風液今何
有東坡有意續茶經要使祖謙名不朽明萬曆辛卯里人
周繼宗□捐□□□□剏其廟於是而遊覽者益象邑侯
廖公撥道邊觀田陸畝與之焚寺已記其事邑侯周公下

車視事且修之暇每□□□□仍益以治平□□□□俱全住僧自佃不使其遊手遊食蓋援釋入農意也嗟呼山之僧藉蘇公而名不朽山之臺藉乎□□□僧有田山其有光矣僧禪禮遂募鑄石以□□久□□□二十五年丁酉歲仲秋月邑鬻序弟子毛復頓首謹書

周侯諱宗邠字肇遷號洪菴武進人□□□□今松陽令以德政舉薦

萬曆十九年撥觀□都田陸畝云云下缺

周邑侯修建城隍廟碑明萬曆二十五年王叔杲

碑高九尺廣三尺八寸文十八行行五十四字正書徑一寸三分篆額八字徑六寸

松陽縣志 卷三 金石 碑文 七一

周邑侯修建城隍廟碑記
賜進士第大中大夫前欽差整飭蘇松常鎮兵備湖廣右叅政永嘉王叔杲撰文

賜進士第亞中大夫四川等處承宣布政使司右叅政縉雲李鍵書丹

賜進士第承德郎禮部儀制青司事縉雲李正蒙篆額
曩余監司吳門與今長松令周侯為世通家好習其賢已久及侯蒞隣邑而余朽不能拽杖履一觀厥施業耳而熟之懿美藉藉矣頃松父老數十輩謁余誦周侯政而乞修城隍廟記於余曰城隍正祀之神也例得與守令共佐一

方之治蓋稱靈爽云而在我松陽者爲尤可頌何也神無常依依於一誠神之靈因人致之歟我周侯甫下車時當積瘵之後默誓於神曰願與神共濟此方以免今日之頹侯已積心與神矣已而旱潦必禱癘疫必禱虎患盜賊必禱然而禱晴而晴應禱雨而雨應禱除惡去惡而除患去惡應神固靈已哉而侯之每事禱以爲民也神之每事輒應以爲侯也神靈昭昭其故乃可知乎向廟圯蕪穢民甚欲新之侯惜民爲休養二年所民再三懇侯乃捐俸如干而子來趨事者雲集焉不數閱月而廟貌鼎新宏敞瑰麗於舊今竣矣求一言記之請終其說焉夫神不可欺以僞

而侯之所以孚神而神應者豈以其虛具云乎哉先成民而後致力於神其醜化郁理不可殫舉如設法催科而緩急當片言折獄而仁明著築堰堤以漑阡陌堅樓磔以擁閭閻其它課諸儒生以文訓鄉保甲以武冰壺秋月之堂有陽春和煦之風迄今時和歲成民安盜息而風化且彬彬焉真衷愿意侯實不欺夫神而神之應嚮而饜夫侯也甯獨一工祝一登豆之爲兢兢哉我松陽之神顯異可頌尤如此庸可無名言以記之余聞而擊節曰有是哉侯之賢至是侯之修廟爲神也所以爲民也民之請記爲廟也所以爲侯也幽明交助上下信孚於是而識天人交應之

理信不誣矣波潤無涯余甚願須臾無死以觀德化之成
詎獨松陽有厚幸哉卽以是言爲記周侯名宗邠吳之昆
陵人也廟修於丙申年之八月竣丁酉年六月望日教護
屬功則善人老人例得並書於後云
萬曆二十五年歲次丁酉桂月穀旦

主簿柯與松典史陳弘謨諭訓鄭王政朱向春楊煊同
修善人周繼宗老人潘伯發

松陽縣儒學遷復城中碑

明萬曆二十三年

李

誌

碑高九尺六寸廣四尺文十七行行七
十四字正書徑一寸篆額十字徑四寸

松陽縣儒學遷復城中記

松陽縣志

卷三

金石

碑文

七三二

賜進士出身中憲大夫巡撫鳳陽等處兼海防提督軍務
都察院右命都御史前廣西提學副使李鋹撰

文林郎知松陽縣事劉幹正立石

儒學教諭丁衍仁陸官 訓導江揮黃通周勝宗

典史蔣魁暄 接管新任主簿汪克溫

學宮之設所以尊道弘教上妥聖靈而下振才賢吾夫子
□□□□□□□□□□而興賢育才屬乎人事不能不
視地靈爲興替詩稱相其陰陽觀其流泉卜吉之說所從
來長□□□□□□本會稽章安□由漢而來世不乏人
如葉公夢得王公景輩皆□□□□□□□者卽我□

起家甲乙第纒纒不絕正嘉以前可考而知也其學宮故
在城中左擁朱山右列金屏瑞氣遙鍾元爲美址屢更良
令代有拓繕自嘉靖壬子□斤斤□其竣而文氣稍□不
振議者亟欲□□來署其故遂謬爲遷徙之舉卜地郊
外費公帑千餘金而始告成此其□□□而事則左矣
舊學爲開多改剏□□垂三十年謝茲□危甚□博士不
寧□□而序僦民舍居之諸生□□□追咎議遷者非計
蓋人人有故宮之思焉會啟聖祠圯則請於前令長張公
繼桂移祀舊學以開其肇會文廟又圯則請於今令長□
公□正非建故□復其初劉公慨言曰此盛舉也吾不惜

俸銀爲若圖之顧謂倅許君必貴日而才庸敏鳩匠程勤
窳惟而任許君曰唯唯時博士丁公衍仁陸公官江公暉
黃公通周公勝宗皆□□□其□有諸□□相與
議曰是役也費且不資盡需於公則難爲上增會於民則
難爲下盍各輸吾力之所及徐生學詩毛生復首倡之謝
生一廉偕鄭生繼智葉生勝芳詹生□□等共八十六民
周□宗王□□日車等聞而樂助之上下齊濟士氓翕起
卽前所改剏者爲明□□□教學森如文廟較故址上
六十餘武而南嚮廓如門廡齋舍並建兩翼街埜□□□
迎衢後□新街而地□□□棟梁榱桷厥稱孔良聖□□

□厥繪孔揚經始於萬曆癸卯之冬竣工□□□□牛
郊外遷學之費而莊麗爽闔遠逾於疇曩蓋羣情鼓舞故
其費約而成功速如□堪輿□僉謂巽方肇秀文曜啟祥
山川蔚□三色多士□□拒歲行將斌斌然接踵青雲匹
休至□□□□石林諸公而上之哉於是劉公函書走包
生洪仇等數百里外請記於不佞□不佞謂□士者□□
樹□□□□之腴沃則大有秋樹之礎瘠□□□□自郊
外遷復城中視制厥而風氣萃師所其教士所其業可不
謂得樹乎往牒如武子之於餘杭則以□於西土□□設
學□作士如文正之於姑蘇□□產於其鄉而捐資以恢

學皆搦□□人不輩出至於今□濟濟稱□盛況松庠兼
二者而有之振作興起勢日以盛不蔡而□其文士必雲
蒸科目必蟬聯矣顧不佞願有勗焉士欲行志堅勁必階
於是而或者反階之以濟其私大都靡於文而道蝕溺於
仕而學缺科目愈盛之邦則士習愈漓一取青紫輒謀利
賈勢登枝而忘其本居鄉而張蚩蠱之毒立朝而競雞鶩
之□何限有士若斯奚取於盛而亦豈朝家養士之意哉
必也以文爲羔雉以道爲準繩以士爲階梯以學爲楨幹
瑰意琦行卓然在世習之表而修之家行之廷並足以不
朽於世此則□之所貴乎盛者也不佞於松之人士自今

不患其不盛而願其毋負於盛也

萬曆歲在乙巳九月吉日

右季銜儒學遷復城中碑及下篇姜逢元重建儒學碑
兩碑對峙矗立宮牆人人共見乃舊志漏而弗載殊為
疏略余在孔教會多年昕夕瞻仰久誌弗忘今為撫摹
鈔錄循其年代而補編之得此遺珠儼同拱璧且兩碑
文辭淵雅書法謹嚴鐫刻亦復精工閱時三百餘載而
殘缺無多尤為金石家之所貴也

又李碑樹於舊儒學頭門內號房牆邊其下截為坭土
所積深埋尺餘余於丙寅二月中浣挖去坭土洗而讀

松陽縣志

卷十三

金石

碑文

七六

之乃越數日至十八夜戌刻頭門號房不戒於火延及
文昌宮焚去圖書無算併縣志舊板均付一炬議者遂
有以挖碑有碍風水為言者會逢其適有何足據雖曰
文字之光上燭霄漢又何至若是意者文昌廢祀文化
不振桓廟之災不為無因爾

高煥然註

重建儒學碑

明崇禎二年

姜逢元

餘姚

碑高九尺廣三尺四寸文十五行行七
十五字止書徑一寸篆額八字徑四寸

松陽縣重建儒學記

賜進士第通議大夫禮部右侍郎兼翰林院侍讀學士教
習庶吉士經筵講官纂修實錄副總裁勾餘姜逢元撰文

邑宦葉以章總理

生員葉元華書篆

自古帝王肇興必首建庠序以長毓人才而侈賴其用蓋綦重也而國家之夔絡營衛恒相與關通凡郡邑庠序之翺建鳩僇或與一代明聖興起之期巧邁則馮藉寵靈志屹蒸動效有可立覩者昔吾姚於憲廟改元鼎建黌宮而成化乙未謝公遷狀元辛丑王公華狀元黃公珣榜眼方肅皇嗣統載葺殿廡而嘉靖乙未韓公應龍狀元孫公陞榜眼同登者二十有八人遜神祖紀元之初又復繕理明年甲戌孫公鑛會元異哉其應歷又如谷答嚮茲松之改朔始圖度也適會今天子龍飛御寓赫然剝逆渙羣威愴

松陽縣志

卷三

金石

碑文

七七

恩洽中外快心之候實新令君甫至征塵未濯毅然身任其事是其所馮藉視姚有加馬而蒸動之應倘尤有異焉者耶按松古屬會稽郡王龜齡僉判紹興著賦於松山川人物蓋侈言之比入國朝南臺御史葉公希賢輩忠英特起卽科名代未嘗乏也顧自嘉靖迄今登賢書者寥寥輒後他邑邑之薦紳暨諸青衿聚而謀曰地脈有流移而衰旺乘焉盍蚤爲變計乎則從內徙而外之未幾又從外徙而內之若奕棋然而卒未有振也且歲久浥漑陀圯而前宰邑者藉口公私匱乏率□□眡之可奈何天不棄松界之陳侯蒞任詣謁俛仰徘徊顧諸生日學之興替唯令是

眎且令職有孰大於是者而松務有孰急於是者顧度所
經費甚鉅或者從旁難之侯曰毋慮於是署提借如干亟
發所得請贖鍰如干又親爲疏作溫懇語勸諭三老子弟
眈庶咸樂助又或舉有可原者姑貰貸之令輸其金矢於
工而又多方設厝未嘗頃曙置諸懷已乃相厥址端厥向
紕工庀材簡厥賢而辦者屬紀綱之役蓋逾年而考曩頽
圯不可搯柱者一旦有闕有施煥然改觀噫哉侯之烈乎
維時予姻友翁君日襄以春官之僑署事松庠走書幣徵
文以記之予誼不容辭則孳不律紀其事而復有諛於松
之諸士夫學以養士匪徒佔佔焉乞靈枯管取科名之謂

也科名以士重非士以科名重也卽予所稱吾姚數公者
或立相三朝猷勳炳烈斑斑琬琰或位躋銓宰誕啟詰嗣
闡明正學或接武忠烈文章節行奔葉敷休暨其餘莫不
存有顯號均有微諡後先雪煜稱昭代鉅公是其所重獨
科名也耶夫斯學之創圖也舉丁明聖興起昌期亦唯是
胥勸胥慎以無負此顯光以無負國家儲養至意抑於侯
之盛心爲無負也虜蓋翁君之誦侯曰侯一代偉人寒冰
爲其擦暎日爲其胸迅霆烟電爲其才而粹養穆如人罕
窺其際蒞松以來拊循刷剔妙中縻窾季進諸生而督課
之所當甲乙絲髮不爽公餘或與講解疑義訖揚令古畧

無倦容蓋諸善政種種臚列不翅詳也予未暇悉數會有別記在內召之日侯諱鍾鼎字仲調別號九石閩之福清人登天啟辛酉科鄉進士

崇禎貳年歲次己巳三月望日吉

重建儒學碑

明崇禎二年

王一中

碑高一丈廣四尺六寸文十六行行六十六字正書徑一寸二分篆額八字徑五寸四分

松陽縣重建儒學記

賜進士第中憲大夫太僕寺少卿前 皇城四門巡視巡按山東廣西道監察御史郡人王一中撰文

賜進士第中憲大夫 欽差提督廣東等處學政兼布政

松陽縣志

卷三

金石

碑文

七九

司右叅政東甌張天麟篆額

松陽縣學建自唐武德間歷宋元至我朝人文輩出代有偉人負宇間正直之氣振揚風節羽儀當世匪直科第之盛也蓋縣界括西羣山聳秀如列障如倚屏峭拔峻嶒而學當縣治之東南百步許得地旺氣宜乎鍾靈毓粹賢喆挺生也乃自隆萬以來賢書稍遜一時抱奇未遂之士輒歸咎於地氣萬歷壬午縣令東粵張公遂自舊庠遷之郊外地既岑寂學舍荒涼無論賢科寥落至今學師僦舍而處生徒講習漸稀士氣益用弗振乃始悔其剏徙之非無如仍舊之便至癸卯瑞陽劉公始從輿情徙復故址二十

年間既舍舊而新又撤新就故縣官苦無經費子衿不憚
紛更倉卒補苴既易腐敗風雨剝蝕日就傾頽諸生既以
僣遷僣復歷科累躋無徵有司又以遞往遞來歲事不閉
藉口任其頽落莫議繕修別駕粵東許公以戊辰歲來攝
邑篆下車謁廟目擊其狀慨然曰以吾夫子之宮諸生講
習之所而傾頽至此夫且無以妥神靈安望興多士特捐
俸百金以充經費不足則釀金以佐之採形家之言覽地
輿之勝正癸丁之向諏時日之良鳩工程材一撤而更新
之工以時興落成有日於是博士弟子員感公德政不數
月爲松庠構千秋盛事也相與請記於予予惟爲政莫先

得人而造士無如興學乃宰邑者鞅掌期會簿書代庖者
轉盼蘧廬傳舍誰若公之以宮墻頽廢爲已慮以振舉修
葺爲士先者可不謂得政之先務者哉且聞廉取者節用
公若浼貞操一塵不染而好施雅念千金可捐其督糧佐
郡與夫署景署縉振寒士恤窮黎在在施恩無不仰公之
廉明戴公之慈惠者至居恒挺直不阿其與同志惟以忠
孝節義相規勉士業荷公修學振興之後共相淬勵科第
蟬聯計必視昔較盛而佩公之教當以公之裊躬砥行爲
師余嘗歷覽天下郡邑有學則有記大概高談經術不則
艷稱科名惟李太白袁州學記以忠孝爲大端古今以爲

至論公所規勉亦復相同則夫服公教者於忠孝大節不
尤喫緊耶吾松先達偉人前代勿論如葉公希賢盧公璣
一腔節烈百折不回亦惟是忠孝大義素所講明士生其
鄉尙友往詰知必不墜先聲負公教也因忘固陋爲之記
并爲諸士勗至公美政多端枚舉莫罄當別有記茲不具
述公諱有寰字汝鎮號鳳石廣東揭陽人萬歷甲午鄉進
士

崇禎二年歲次己巳三月望日

文林郎松陽縣知縣陳鍾鼎立石 奉委督理主簿王
元科典史毛才興 生員徐名登書丹

松陽縣志

卷三

金石

碑文

八一

邑宦總理葉以章 閩人張得楫劉汝卿鑄

重建松陽縣學碑

明崇禎五年

溫體仁

烏程

碑高九尺五寸廣四尺文十四行行六
十三字正書徑一寸篆額八字徑五寸

松陽縣新建廟學記

賜進士第光祿大夫上柱國武英殿大學士少保兼太子
太保戶部尙書纂修實錄總裁茗溪溫體仁撰文

惟松有學肇建於唐武德間厥形據勝卽魏科顯秩代不
乏人而砥礪名節恢宏經濟者實挺生崛起於其間迨後
人文差遜往昔際神廟壬午而當事者遷之於郊迨癸卯
尋還故址遞徙遞復弈棋築道是用棟宇欹頽甍瓦紛裂

東西莫適卽□先聖在天之靈且搖搖靡止而多士之無
從顯遂無感也歲戊辰郡倅粵東鳳石許公視事長松謁
廟憬然遂以常俸百金庀材鳩工建□先師廟蓋役僅告
竣而未備也客歲秋楊侯儼然來蒞茲土操絕一塵政興
百廢雅加意學校不數月間彼俊髦談文講德要以沃之
於經術而俾以發爲幹濟士蒸蒸向風然尤以行當大比
必先聖賢之靈妥而後文運憑以振祀□先師而不爲□
啟聖地卽教孝恐勿安崇□啟聖而不爲文昌地卽摛辭
虞莫耀於是捐俸以倡題檄爲釀而□啟聖祠明倫堂與
文昌閣今而後迺煥然以一新矣松邑學宮旣得許公以
引其緒於前復得楊侯以奏其成於後蓋自□啟聖有祠
而行且擇吉以奉木主舉釋菜儀而□先師之志在孝經
者以慰自文昌有祠而行且繪像懸星與朱衣象簡侍司
桂籍者翊□先師以益昌文運而松士之凌厲雲霄者可
券而又師生有舍遊息有所以至繚垣庖福遂與其祠廟
之中天矗起者秩秩翼翼中矩合符其視向之霾蝕蘚駮
鞠爲茂草而建置迄無有定者相去果何如也哉楊侯諱
應華字寶甫號若木南都鄉進士寧國人余不佞備員館
閣以仲弟忠訓司教松庠合諸弟子員以徵言於余而爲
之記之如此豈

崇禎五年歲在壬申夏月之吉

儒學教諭溫忠訓 署學事舉人唐良銳

訓導吳胤昌 督工省祭葉經試

總理邑宦葉以章 閩人張德福鑄

東嶽宮碑記 明崇禎

王一申 郡人

據舊志錄人碑之高廣行數不計

松陽縣一里許有逍遙觀在雲巖之陽載在郡乘翔自梁大同間舊名洞陽至宋宣和始改今名前有太保殿中有東嶽宮後有觀音殿歷年既久蕪穢不修蓋邑介萬山不通商賈土磽賦重民不聊生故象教南來寶刹凌雲靈姿

松陽縣志

卷三 金石

碑文

八二一

炫目寺宇之興浙頗稱盛而我郡在在荒頽亦猶民困財匱檀越助少而一二緇徒羽流罔知戒行蠶食糜廢寺觀田租盜典潛粥門墻倒塌象貌淋漓非惟修葺不加且速之敗焉而藉以爲沿門索化之囿者比比而是宜逍遙觀之鞠爲荒基也有僧寂然者其師祖性元暨其師海潮先住平濟橋恪守清規合邑推重僉舉住持是觀先是萬歷丁亥邑有善人周一芳獨建東嶽宮自性元師徒所剏太保殿及山門兩廊於是舊之廢址茲頗改觀而觀音殿尙未建闕焉在懷歲己未寂然乃承師志募緣締造輿情既協宿願易諧眾以樂助工以時舉殿廡煥然而大士金身

羅漢諸天寶相裝塑一新爲長松一邑之勝焉縣故有治平寺爲歲時嵩祝習儀之所寺觀荒穢縣令西蜀范公見是觀剏修偉麗於以陳鹵簿而安龍亭爲便因率僚屬就此嵩呼歲以爲常而里老等復念膳日闕乏無以助焚修而延香火公議請撥治平寺田二十二畝有奇用爲香燈之需縣令錫山宿公檄管糧主簿易君查從所請申報縣郡司李安陸金公覆核報可宜勒之石於是寂然重繭抵郡丐余一言余謂是觀之興以奉道也乃羽流廢之僧能興之則夫治平諸寺之田以膳僧也能廢而興之則亦得取其廢者而有之故所修者觀也而以奉佛去其觀而可

矣治平等寺之田也而以歸之觀去其寺而可矣寺耶觀耶道耶佛耶何彼何此何去何取耶矧乎在道佛爲幻場以嵩呼告天祈皇圖之永固則不啻莊嚴之法界習禮樂之要區矣則夫撥田以示其香燈之傳續是金公與二令君篤於尊王之大義也甯與夫招提蘭若秘宇靈宮稱淨土而課清虛者埒乎哉是宜爲之記因書以遺之

慈雲菴碑記

明崇禎

邑令

楊應華

宛陵

據舊志錄入碑之高廣行數不計

松陽青雲山去縣東十里其間廣山大川橫亘不絕列嶂憑虛飛塵作氣其始出也微乎若一縷其散漫也變換而

莫可端倪乃雲之最深處也僧真亮募建梵宇於山之麓
分林構跡接磴開塵霧道相縈烟房互出郡司李縈山王
公經其地額其扁曰慈雲蓋喜其綠嶂斜霞望軒而籠蓋
也余竊紀之書以爲山靈增崇因勒記菴楹撥香火田若
于畝鐫之於石其詞曰惟彼青雲列起高峯山川絡繹蟠
際於東縱橫原險四達之衝卜茲勝境大啟梵宮基崇苑
鶴土淨垣龍金枝玉葉五色菁葱重樓疊閣一帶橫空無
心出岫有意生風甯獨繞菴之分郁仰欲徧地之皆全願
作霖雨澤潤萬松

邑令張建高重建城隍廟碑記

明禎崇

張國維

義烏

松陽縣志

卷三

金石

碑文

八五

據舊志錄入碑之高廣不計

法制莫重於祀典所以崇德述修也我國家定鼎卽命祠
部修舉內外大小祀典命鴻臚編定禮儀城隍廟爲司土
之神邊隅保障省直郡縣咸建立焉守令則歲薦月祀至
虔肅也松邑有廟久矣至成化間劉侯琬修建殿廡萬歷
中周侯宗邠改門觀范侯錕設造木柵丹堊棖樑今二十
餘年矣屋霑穿草漫成溜滴神或不安會三韓張公諱建
高爲麗陽翰博望起當道兩攝松象除知縣事因惻然堂
廡圯壞布金重葺於是擇邑之耆老邦之彥達者勉以翊
贊厥成未幾望風景附樂輸者鱗次而至於時大匠駢集

魏焉喬棟卓焉魁樑復簷疊閣臺榭欄楯廊廡兩翬各展
十數武結構新精自上冬迄春已告落成咸侯誠心有以
致之於是董工諸人願爲勒石適余庠學博詹君仰佐因
邑人之請來乞記不佞隣治於枯義不敢辭予觀古昔循
吏與神呼吸有靖河神而聲價騰張者有正廢祀而蜚聲
特起者有守漣水與郡城隍典客聲諾者皆若影響今公
之重修鼎新固宜有以迓神休獲多福而惠我民矣遂記
之以爲後券

儒學義田碑記

清順治

郡守 王崇銘

據舊志錄人碑之
高廣行數不計

松陽縣志

卷三

金石

碑文

八六

田以義名志公也亦志宜也公則無不可行宜則不可不
行顧天下事其始莫不周詳正大而其後利積弊生以至
不可究詰又有人起而整頓之則亦可以不廢豈非不惟
其法惟其人之謂與昔范文正公立義田以惠族其法擇
一族長之公正者主之自贍讀外凡喪祭冠婚皆得給焉
朱晦菴先生建社倉以惠民其法十家有甲首五十家有
社首夏散秋收豐則加息歉則蠲其息之半大歉則盡蠲
之然皆未聞經理學田因學田以贍民也松邑儒學舊有
田二頃餘經狐鼠之侵蝕不可問矣其後士之好義者捐
金置廢寺田若干與前後署縣者撥助廢寺田若干稍稍

得復舊額而奸徒又將銷沉之訓導孟稱舜慨焉以清釐
爲已任并捐貲置田若干於是田之歸實者得頃半有奇
蓋自有而無與夫自無而有凡數變矣訓導請著爲義田
之說刊石以垂後余惟此有三利有五弊焉宮墻頽圯齋
房毀敗可備修葺利一寒士困頓可資膏火利二有無相
通豐凶相酌可濟貧乏之可饒積儲利三然或用一費二會
計不實則卮漏之弊宜講也附影爲形借甲爲乙則冒濫
之弊宜講也典守非人損公營私則收盜之弊宜講也豪
猾侵隱變亂成額則佔匿之弊宜講也願貸之戶必皆孤
貧追償不應勢必鞭撻鞭撻不已必至逃亡逃亡之餘或

累隣保則苛歛之弊宜講也誠參文正晦菴之意而行之
去此五弊以存三利則義田之置可以垂矣雖然物成斯
毀事久斯變其能永保乎使再世而後得身任其事更如
訓導者則義田之置亦終不墜矣

順治甲午孟夏中憲大夫浙江處州府知府前戶部郎中
析城王崇銘撰

志公祠義田碑記

清順治

訓導

孟稱舜

會稽

據舊志錄入碑
之高廣不計

義田隸之志公祠者何以田爲松邑之公田而非吾學之
私田也凡郡國州邑之間有學則有田以供繕修以資賑

濟獨松則有異松邑向有田二頃餘不隸之學而隸之縣
宮墻之頹敗無所待理焉貧士之困阨無所待濟焉嗣後
邑人有吳繼澄者始捐田歸學而諸生輩復請之前後縣
公撥廢寺觀田助之日久時湮奸蠹復起乘之前者之田
幾更亡矣舜不敏司訓是邦嘗竭蹶以董修理之役私念
曰欲修理學宮必自清復學田始學田不復則修理無資
募金鳩工此可暫不可久之術也已更有徽人孫煥者墾
廢觀荒田數十畝自給煥卒田無所歸予爲之殮而以其
田歸學又有邑人葉登俊葉鴻儒包嘉柄各捐田助建義
田而余乃爲之說曰夫置田於學將與學之人共之抑非
止學之人也旣爲松之田則松之人皆得共之蓋其田而
僅爲松學之田則田猶私田也人猶有得而侵之者其田
而旣爲松之田與松之人共之則亦將與松之人共守之
此其田可以千百萬年而無失後有尙義者更起而附益
之則其田益多爲利於松之人也益廣因以其說上之郡
侯王公公署其牘曰義田之立可以供修備賑此盛舉也
勒石以垂自杜隱佔之弊諸生乃更醵資以勒之石嗚呼
天下有治人無治法昔范文正公立義田以惠一族余今
立義田以惠一方田寡於昔而意則加闊蓋彷彿朱晦菴社
倉之制而畧神其意以行之者也晦菴文正公法立非不

善也而今已湮滅無復存者則法之存久弗失也豈不以人哉懃守而擴充之是不能不有望於後之君子銘曰義田之制彷彿古社倉畧神其意一修學宮稍敗卽葺勿使大壞以致鉅費各穀廿石分給兩衙無得過支以開卮漏一卅會課一濟貧士數者所餘夏貸秋收息不過二要使日積以爲可繼歲遇大祲罄儲以賑稔則歸毋勿責其子是名義田爲億世利

邑令葛永振德政碑記

清康熙

徐開熙

據舊志錄入碑之高廣行數不計

歲在辛卯暮春之月松人庀材鳩工爰作之亭爰樹之石

松陽縣志

卷三

金石

碑文

八九

請余記記爲誰三韓葛公德政也公以盛才佐栢郡前署宣平有惠政民歌思不忘今署松未至而民喜蒞事六月而頌聲作凡政之道務興學校宏風訓公下車諭誨諄諄勸以名義於是士競奮循孝弟毋卽非淫凡政之道貴相地宜擇天利縣東北里許林麓森秀嵐峰聯合實維松之脅脈先是禁人開鑿以故聞人傑士彪炳前代近爲私置水碓地脈受傷人文衰止公允輿議令遷徙厚償其值邑人永賴凡政之道貴崇實事而少虛文民有因事波累鬻弟輪鏹公訪知捐俸贖之不令衆知凡政之道首食尙農公糾覈勤惰單騎出郊見力作者賑以金民知本謀地無

遺利凡政之道貴崇賢旌善義深追遠先賢葉公希賢程公榆或忠在先朝或勳高後禩公憫其祀廢遂肇舉焉凡政之道貴興利除病與民經久先是松有運首每年點解集米至府所費惟艱公議革之民患始蘇凡政之道貴釐夙弊公却羨餘立規條吏無容奸民勸輸之凡政之道務與民休息民有訟者公曉以利害諭之使解訟獄簡息有刑措之風凡政之道貴德威兼濟兵民雜處時有齟齬公繩以法不爲勢屈不爲威阻凡政之道貴應變有方山賊逼城守將戰歿人心違違公絕橋俾賊不得渡嚴飭門巷親率鄉勇周視固防賊覘有備始遁公之德政班班在人

如此松人頌公之德政歷歷如此乃公則曰余不敏不能宏興化導猶煩具文然但知在寂不擾臨事不避與爾百姓坦白一心遠邇無間而已然則公之不欲多一事者止其未嘗省一事而於民見其日新者正於公見其日休也吁可頌也已公諱永振號長城由明經三韓之甯遠人

重修松陽縣儒學碑

清康熙二十一年

鄭載颺

縉雲

碑高八尺廣四尺六寸文二十四行草書徑一寸篆額十字徑四寸

張公重修松陽縣儒學記

賜進士出身內閣誥務撰文中書舍人辛酉科奉命江西典試縉雲鄭載颺撰文

中憲大夫貴州貴陽府知府甌水陳象乾篆額
杭州府仁和縣後學許潔書丹

按松陽縣學建自唐武德初歷宋元明迄今計一千六十餘年其地居邑之中四山拱秀屏障參天代鍾高賢人文蔚起故明戊午年間別駕鳳石許公來攝松事捐俸更新松士爲之立碑東廡志不忘也我朝定鼎以來廟貌如故歲甲寅閩逆倡亂寇聚於垣民無完室而聖宮亦爲之傾毀草茂之歎有同慨焉丙辰秋王師告捷是歲之十月邑侯張公奉命來是邑甫下車謁廟覩茲頽廢惻焉傷之謂夫子之教垂萬世而無以修厥廢墜何以冀其

興士類而崇文教耶卽思修葺而時絀舉羸蓋以松邑甫離湯火驚魂未定不先養而亟議教鮮克有成於是亟圖招徠撫綏之謀惟是賑難民贖繫蹄議救荒革重役修堰陂開義塾諸政咸舉則修葺學宮斯其時矣適於丁巳冬歲計以宿逋之漕起部議將有左遷邑父老子弟皇皇失所控籲當事疏請戊午冬蒙拜俞旨父老子弟環集歡呼慶我父母得重撫斯邑越明年己未公戾止泮宮集諸生慨然曰邑之有學關於風教以明人倫良非淺鮮亦安可聽其廢墜而不爲之計耶余前此有志未逮今旣富方穀矣是役不可緩予旣不憚拮据爾諸生亦宜黽勉從事

多士唯唯公隨捐俸擇吉龙材鳩工皆踴躍趨赴不四月而成庠士佩公之德欲銘石西廡以垂不朽而問記於不佞載颺隸屬隣氓夙聞公以穎異之資挺生鑿閭經濟學術涵蓄有素其出而牧民也以豈弟之心施之政績其待士也隆以氣誼優之禮義歲有拔月有課橫經授餐悉出水俸何莫非造就人材之至意茲之整理黌序經度規模首飭殿庭次治廊廡丹檻畫棟聖壁踈櫺各中其程既藻繪於重新復崢嶸於始建厥後膠庠俊秀彙茹而升者當思由來矣公所以仰體 聖天子崇學右文之治不具在於斯耶載颺不揣謏劣而謹爲之記公諱景留字心韓號

漢孺奉天遼陽籍平原人

右張公重修松陽儒學碑在文廟西廡碑文分列五層每層均二十四行行九字至十二字不等行草書約一寸許筆情瀟灑輕圓流利矯若游龍刻工尤精妙不差毫忽其分層摹刻者意在便於裝本俾後人作法帖也許君未署官銜而工書若此必非尋常人物我松文廟碑碣林立書法以此爲最特爲標而出之以資後之摹搨者高煥然註

舊市永甯觀饒田碑

清康熙四十四年

武方蔚

據鈔本編入碑之高廣不計

永甯禪林膳田之記

自昔世尊於舍衛國祇樹給孤獨園每於食時持鉢入舍衛大城乞食於其城中斯時也給孤長老已布金買地作精舍而世尊尚爾乞求於人洵食之爲重矣夫食必從田而出苟有庇身而無其田則雖法如世尊道如世尊弟子之衆如世尊猶不免因丐食爲活況其他乎松之舊市永甯觀者建自唐宋年世遠而椽木腐壞迨至甲寅兵燹之餘殿宇傾塌幾成荒坵矣於康熙二十六年邑郡人氏延請僧緣生暨其徒浩明等竭力鉢化前修大殿後建禪堂煥然維新且寺原有田四拾五畝俱屬磽瘠僧能節縮錢刀廣爲續置共田至貳百四拾畝於是每年所收租入爲繕修佛像供養香燈之外而凡在寺諸僧皆得以爲衣食費雖水旱無憂於凍餒可謂盛矣今緣生已故而浩明恐其得之甚難而失之甚易也年歲久遠將有個人乘機侵沒使寺僧不免於飢餓者求予文勒石爲持久計噫僧最慈也又最弱也慈則人以爲可欺弱則人以爲可取所謂乘機侵沒者不誠有諸因聊述其意使鑄之石將見寺益久田益增僧益象有皈依象教入沙門而住持則香積廚中麤糲有資豐歉有備可無事着忍辱鎧持應量器求繕於城中矣時

大清康熙四十四年乙酉歲嘉平月吉日

文林郎知處州府松陽縣事襄平武方蔚撰

合市延請善信葉培高等二十六人

督造東甌護法陳性遠曹洞派本林徒孫訓能悌慧

能侄孫善能元孫淨悟立石

八都古治永禁夫役碑清康熙五十四年連青

據鈔本編入碑之高廣不計

永革夫役碑記

奉府憲劉示為號憲飭除擅派夫役事據松陽縣古治士民詹得留潘伏生等呈請禁免該地方夫役情由到府隨

松陽縣志

卷三

金石

碑文

九四

經檄行該縣查案去後今據該縣詳稱卑職遵奉憲行止在查覆關文據八都古治士民蕭一鳴詹宏佐吳名高孟家鏢等今呈詞稱緣身八都古治地方夫役歷蒙各憲恩免正緣未奉勒石永禁以致夫役疊派民苦奔命身等具控府憲蒙批查案飭禁今幸福星按臨念切民艱恩賜詳請勒石永禁革除八都夫役地方老幼沾恩等情肯求應請邀恩勒石永禁出自憲恩批示遵行等情并送民人陳正如等控禁夫役碑模到府據此除批行外合行給文勒石永禁為此示仰松邑八都闔都士民人等知悉自禁之後一應夫役永行禁革倘有官胥地棍再敢陽奉陰違滋

役擾累甚至折乾許被派之人指名赴府呈控官則詳揭胥役地棍立拿提解嚴重處治決不寬恕本府言出法行各宜凜遵慎勿自貽後悔須至碑者

松陽縣正堂連給模鑄碑在東嶽宮前左墻

康熙五十四年八月 日給合市士民孟履尙等立

創建義學碑

清乾隆

令邑

陳朝棟

據舊志錄入碑之高廣不計

嘗考既富方穀物畜有禮益養爲民命之本而教爲風化之源故祭菜鼓篋宵雅肄三未始無環堵之宮如京之積而能使講貫習服焚膏繼晷以克底於有成者也我 國

松陽縣志

卷三

金石

碑文

九五

家重熙累洽休養百年凡省會郡邑設立書院有裨益於士子者靡不次第枚舉苟膺民社之責何可膜視也哉予承 命茲土下車之日卽以士風爲兢兢粵稽松邑地處山陬比者賢書鮮登名儒未達然瀛水鍾英玉帶滌迴雲巖毓秀蒼松呈奇總是 蔚諸虛擲奚容致憾於山川或者指點乏人不免失傳乎衣鉢用是捐俸倡建以開其端紳士繼美而成書院但慮膏火闕資束修莫措特於簿書偶暇查有原存學田并崇覺寺僧房舍利菴壽昌寺廢寺田地或爲豪強吞佔或爲胥役侵蔽者逐戶清釐造冊申詳各憲允准撥入書院收租誠恐善後維難茲將書院之始

末田畝之額數條分縷晰鐫刻於碑以垂永久庶幾連鑣並轡欣看桂籍題名鼓鬣揚鱗快覩龍門躍浪以仰副聖朝棫樸之風亦不負振興雅化之隆矣諸生勉旃余將拭目俟焉

重修通濟堰碑記

清乾隆

郡守 劉廷璣

據舊志錄入碑之高廣不計

栝在萬山石田齒齒然特倚陂塘川澤爲旱備但陂塘瀦蓄有限值久霽輒病嘆乾獨東西二鄉有堰民恃以爲利然東鄉地狹田稀物產鮮少惟西鄉平原廣野物產故常饒人利之抑知所恃爲利之大者厥惟通濟一堰始於梁

詹南二司馬繼成於宋郡守范公成大參知邑人何公澹大約障松遂一溪之水分派爲三百上中下源爲三概爲七十二灌田頃二千亘四十里千百年間屢圯屢修丙寅歲悍流衝激堰壞且盡前此有議修者以費浩工繁試舉輒止今年偶早惕志用禱齋虔徒步旣而得雨西鄉有眾率籲余謂堰利不復患終不免余因重爲災理遂出俸若干令鄉之諸生耆老有幹練者領之俾董其役而以幕員趙鏗督其成旣命牲陳詞祀於龍祠并司馬廟聿告始事一時匠石備具工作畢舉鄉之民衣食其間者悉子來趨事若木若石肩舁箴載畚鍤如雲日以千數其修砌一循

故道築者崖耶置至斗耶疏者函耶窒者穴耶開者圳門
耶拓者諸概耶挑撥者淤沙之停積扞掘者圳道之淺塞
耶時又適久晴水涸天若有意以相此日之興復者斯時
也厚廩工而工興廣利人而人奮事半功倍成以不日工
始以癸酉十月下浣竣於本年十一月下浣落成鄉之人
且鼓舞歡呼聲震川谷間凡起大役動大衆每至勞怨若
茲不以爲擾而反得其欣感何哉於是縉紳士民相與拜
手而前曰是萬世之利也公之惠貽我民者至矣其敢忘
所自願將立祠并乞文以記余因作詩一章以謝之且以
此特有司事耳功何有哉惟是願我民因天時順地利又
盡人力勸耕勤稼各力本業夫然後賦稅有所供而生聚
亦日益余乃得藉以上報無負 朝廷惠養元元之意然
而以千百年相傳之利與今日難舉之功一旦自我致之
余雖不敢自以爲功而其所以盡力於此者要亦有所不
得辭矣特記之以告來者

李邑令修建城隍廟碑

清乾隆二十一年

碑高九尺廣三尺六寸文二十二行行四
十七字正書徑一寸篆額八字徑四寸

李侯修建城隍廟記

神道設教先王尙矣 聖天子乘乾出治地方之任寄於
有司而復設立 城隍神廟使民崇祀蓋謂聰明正直足

以遏奸邪驅魍魎保釐疆土福佑士民炎炎奕奕於今爲
烈也松川僻處栝西山高木茂地廣人稠數百年來民生
其間耳不聞愁慘之聲目不覩阡危之狀熙熙皞皞安堵
無恙桑麻雞犬共享太平莫非 神道英靈保障默佑之
所致顧代遠年湮門樑圯塌垣壁剝蝕瞻拜者每相視而
歎息卽有志恢廓亦苦於力之難繼去歲乙亥董事人等
正欲起而光大之適夏五月李侯恭膺 特簡來蒞茲土
迺毅然謂此事非異人任實予職斯土者之責於是捐清
俸諭紳耆率各都士庶踴躍而贊勳之而一時輸貲樂助
鼓舞爭先者殆如歸市焉以千金之修費不數月而畢舉

李侯之善政此其一端云且夫神之爲靈昭昭也至幽而
實至明至微而實至顯松邑運會昌隆賢侯相繼接踵而
治其間法良意美指不勝屈顧深山窮谷之中或猶有桀
驁不馴者甘外於 盛朝之雅化自李侯一至宣布 聖
諭廣訓敦行風教執法無私凜然難犯迄今宵小藏形蒸
蒸丕變則卽我侯移風易俗之妙術益悟神靈潛孚默化
之威權所謂幽有鬼神有禮樂理本同條義亦共貫也
今秋歲登大熟五穀頻升農歌豐稔之章戶有倉箱之慶
而李侯奉調入闈分校閏九月朔日自省公回入廟虔謁
等喜堂構之輝煌仰神威之赫濯而并樂父母之復我

邦土因叙其始末以誌盛事於弗衰云李侯諱國才號棟
堂乾隆丁卯科鄉進士廣東廣州府南海縣人時乾隆二
十一年十月吉旦合邑士民潘景灤等立石

重葺雲巖勝境碑記

清乾隆

邑令吳鳳章

據舊志錄入碑
之高廣不計

嘗閱地志浙東諸郡多名境勝區蓋山川靈氣磅礴鬱積
亦有人爲洩其秘而發其奇如天台鴈宕各名勝秀絕人
區有由然也庚辰歲余恭膺簡命蒞松心切撫字未敢
怠遑屆期年政通民和公餘之暇覽視山川見城北二里
許有雲巖山林壑幽邃雲霧溟濛殊爲佳境向倚山巔巖

洞小結蘭若而山之繡蹤綿跡多沉沒草莽中余顧而惜
之欲爲啟闢其奇以供雅人韻士之遊是亦潤色太平之
盛事也其時紳士同余遊者共搜奇之志攬勝之情與余
適相投遂因天造地設之區施上棟下宇之用因境布景
就象設色向之沉沒者一朝畢露從山麓西偏而上兩石
夾立中有小疊螯石徑數十級幽折如鷲嶺再數武傍峙
巨石頂有坎如盤廣六七尺深如之有水色清而碧味淡
而溫或謂石乳其信然也過此有澗架梁七間高樹蔭其
後峭壁列其前倚檻曼立飄飄乎如跨霽虹左上碧嶺有
亭當山嘴遊鹿飛禽上下往還幾不知爲人境矣延袤而

上行徑屈曲草磴迂迴上下兩巖洞增鑿深廣各三五尋
中奉胡公之神洞前構殿宇高敞清曠俯矚原隰眇眇城
市鱗列環松東西南諸峯氣象萬千旋眸一覽真覺晴偏
好而雨亦奇他若丹崖碧巘綠竹青松足盤桓者不可殫
述其布置之巧點綴之工可抒幽人之懷抱暢韻士之襟
期諸君之力非淺鮮也嗟乎今之雲巖猶夫昔也一經整
理而灌莽之鄉忽爲怡情之地彼深山窮谷豈無名勝如
雲巖者而搜求無人湮沒不彰可悲也已顧靈運有斤竹
之詩興公有赤城之賦而天台鴈宕石門其名益彰古今
同不同未可知而撫景流連不能自已故縷述諸景聊作

題引刻於石上以記雲巖之勝概云

重修金蓮菴暨創建郵亭碑記

清乾隆

曹立身

邑令

據舊志錄入碑之高廣不計

縣治西北之和仁橋距城十有餘里爲松遂往來之孔道
羣峯拱翠一水中分而金蓮菴適當其所每逢各憲按臨
經過茶肩憇息罔不檐帷暫駐余維以妥神之地而款接
上憲竊恐體制之不倫也爰於戊子小春卜築菴旁之東
偏一區捐廉創建郵亭三間週以垣墻其時飭材方始每
瞻廟貌傾欹欲兼營而懼力之不繼也月一陽適前本府
倉巡盤屬縣道經展禮見夫殿基湫隘因慨然有聿新式

廓之思僧得勝面聆鈞諭欲廣募衆緣以成之余曰向久有志此固地方官所宜董率治工者也緬維菴基自嚴衢諸峯蜿蜒數百里而來水抱山環胎茲福地其內堂奉觀音大士及普福諸天象禱祈多應而石麟錫慶猶是菩提一片婆心先是遂令王因公過境默祝得見爰承憲德卜吉經營地仍舊基而新建之除捐廉外都人士入廟思敬尤宜壯觀瞻而隆結構余乃仰拭大士像重塑金身至今猶懸頌額以是遠近士宦商民凡禋祀求子者維熊協夢靈感異常菴之外堂則奉關聖帝君像神貌莊嚴呵護一方屢仗英靈之保障及隨緣樂輸若干緡鳩工庀材經始

於己丑仲春落成於是年之八月其內堂加以黝聖煥彩聿皇外殿則重興修建正中仍安妥神像東西連接配房二間及外之山門轅門並茶亭亦皆漸次修整完廓視向之湫隘傾頽者較然改觀他時各憲經過亦差堪與郵亭相輝映斯固神庥之感召抑亦憲德之栽培地氣鍾英人文毓秀今而後神所憑依將在是矣余也祈福降康之意善與人同竊惟數年來迓天庥而慶時和荷佛之聖帝之靈佑啟後人從此風水陰功佇看左宜而右有知將來之降神錫祉者正自方新未艾也余於諸士民實有厚幸焉爰紀顛末以勒諸貞砥云

重建朱子祠碑

清嘉慶二十四年

碑高八尺廣二尺二寸文十一行行四十一字楷書徑一寸篆額四字徑四寸

朱子祠記

我國家重熙累洽文教昌明作人之化上軼成周士生其際涵濡 聖化沐浴休風宜如何砥礪濯磨以自成為遠大之器顧其樂育則端自朝廷其栽培則任諸學校而或有虛心求益修脯無儲奮志觀光資斧難措未始不足以餒其力學之心而阻其進取之念也吾松向有明善書院爲合邑義學牧斯土者敦請宿儒造就後進甚盛舉也第其事自邑侯主之往往由於上憲之推薦而主講者坐受

修金終歲會不一至焉此紫陽書院之所由續建也書院

朱文公祠舊址爲前邑侯黃公槐所建嘉慶庚申溪流泛溢祠宇傾圮迨至戊寅邑人士慨然有志重建并欲於祠後餘址另建義學除山長脩金雜費外餘蓄分給鄉會兩闡舉子路費維時酌舉董事議向合邑勸捐而老成遠見者以爲銀錢恐難積儲計可敷鳩工庀材外殷實者畢竟捐助腴田可垂久遠四鄉聞之皆以爲然或銀或田無不踴躍捐輸約得銀貳千兩零得田五百陸拾餘畝祠於己卯涓吉營建越庚辰落成祠後建三楹以置倉廩次後又建樓屋五楹以作書院告竣後卽將各捐戶芳名勒石

外復公議條約並租石土名畝額及一切費用章程付諸
梨棗昭公舉也慎遠圖也然吾於是舉而竊歎夫有志則
竟成爲善無不報之語爲不虛也夫吾松在萬山中風氣
醇厚崇尚實學彬彬乎質有其文宋元以來如葉石林項
平甫王文季潘叔度諸先生出則爲名臣處則爲醇儒者
代不乏人至國朝王汝棐葉天彩兩先生後掇巍科以去
者不數數觀今此祠一建科第相繼而翹材復輩出咸興
起於重熙累洽文教昌明之會以歌詠我國家作人之化
於無窮者孰非是舉之有以振興也哉大清嘉慶二十四
年乙卯歲冬月董事楊開甲許景銘等二十四人立

舊市東岳宮太保廟碑

清道光四年

碑高七尺二寸廣三尺三寸文九行
行三十字正書徑一寸四分無篆額

重建東岳宮太保殿碑誌

舊市卽舊治前此邑主之衙署在焉是以有東岳太保諸
宮殿爲邑主朔望行香春秋致祭之所今雖官署已遷而
廟貌猶存自唐宋以及前明屢加修葺所謂有其舉之莫
敢廢焉者也嘉慶戊辰吾市諸董事因兩廟漸就傾圮倡
議重建於是各士民踴躍捐資兼積釐金襄成盛舉凡棖
桷楹廡與戲臺頭門及諸神像較舊制而加美焉又於東
岳宮後拓基地一片以爲日後恢廊規模之地至道光癸

未落成是舉也沐傅彭鹿方劉諸邑主爲勸捐歷年一十有六載經費一萬數千金甚盛事也因作碑記之以垂不朽云

董事鄭國柱等三十四人

住持道人邱明淨徒祝開祥徒孫王起昌全協力募建道光四年五月 日 孟居仁書丹 劉丹書鐫石

重建明倫堂碑

清道光六年

令邑

湯景和

碑高八尺廣三尺八寸文十三行行四十字正書徑一寸二分篆額六字徑五寸

重建明倫堂記

賜進士出身加五品銜松陽縣知縣滇西湯景和撰文

松陽縣志

卷三

金石

碑文

百四

教諭錢唐趙謙

訓導餘姚汪均

前任教諭徐鶴振

典史陽湖黃昌慈

本邑舉人饒慶霖書

松陽縣學建自唐武德四年迄今千二百餘載矣出宋元明以來再建再修詳於邑乘可毋贅叙惟明倫堂於國朝康熙四十年間邑人公捐重建閱今百又四十餘年歲月久遠楹桷倚頽棖題剝落不足以肅觀瞻竊維建學明倫爲化民成俗之本余蒞松有年時登斯堂進諸生宣聖天子德化見堂宇傾圯慨然有感松雖僻處山陬人安耕鑿士風樸茂履斯堂者將以勸學興賢修明至教一堂之興廢一邑之風化關焉第庀材鳩工所費甚鉅方躊躇

問適明經葉君豹巖進而言曰此無俟勸捐也卽慨然引
爲已任於是購材集料經始於道光辛丑十一月望日落
成於壬寅之秋檐柱軒昂垣墉鞏固規模較前壯麗凡用
銀五千四百九十八兩六錢邑人士請紀其事垂諸久遠
余謂是舉誠不可以不記其亟勒石於堂側俾後之人知
豹巖之急公好義有如此者豹巖名文蔚字煥廷居城北
其品學爲闔邑人士所共欽生平善事更難僕數而此舉
尤爲能識大體云

免抽十二都肩挑山紙釐錢碑

清同治八年

徐葆清

邑令

據鈔本錄入碑之高廣不計

示爲勒石永禁事案據珠岱等庄民人葉成棟葉毓華鄭
開喜葉關澤葉文才葉宗才葉奴才葉關火等呈稱伊等
專靠產竹做紙肩挑城市售賣度活詎張芳珠等趁免坐
賈官釐機會以建造東嶽宮爲由設立公座聚董勒捐攔
路抽釐公叩示禁並據葉廷懷等稟訴及李砭庚等具呈
各等情業經示禁在案茲據葉成棟等以葉廷懷等暗囑
紙行扣留捐釐錢文存行不付希圖續捐叩請勒石永禁
等情前來除批示外合行勒石永禁爲此示仰該鎮士民
人等知悉嗣後爾等如爲捐辦地方要務祇可擇殷善勸
其肩挑竹紙之輩不准私行派捐而葉成棟等亦不准因

嫌滋端如敢故違一經訪聞或被告發定即提案從重懲
辦決不稍事姑寬其各凜遵毋違切切特示
同治八年七月二十九日給

右碑立在松陽縣公署舊志已載有題目而未載其文
今據名譽采訪員孟學會鈔錄原文函請登載以其有
關金石特爲之補登之

邑令支壽伯德政碑

清光緒元年

葉佐清

邑人

據舊志錄入碑
之高廣不計

公立邑令支公德政碑頌

溫溫君侯襟度函宏以疇我民德徧羣生昭昭君侯洞察

松陽縣志

卷三

金石

碑文

百六

幽隱以臨我民此焉則鏡懇懇君侯樂育有儀以訓我民
斯文在茲肅肅君侯履占考祥以飭我民亦孔之章

大清光緒元年元月吉旦

前任丹徒縣主簿部民葉佐清撰

松陽縣合邑士民公叩立石

永甯寺田碑

清光緒二十三年

郡守

趙亮熙

據鈔本錄入碑
之高廣不計

堂論此案永甯寺田二百四十畝被僧魁然同其徒德三
廢賣殆盡實屬可惡魁然德三俱即行驅逐所有該寺遺
產無論何人所買均着一清還該寺應如何辦理方爲

公允著洪芸程宗周汪爲霖孟維明項宗儒劉德容等會同地方公正紳耆妥爲經理並延一守清規僧人承接香火已毀之碑照舊重刻並將重興寺基緣由另刻一石以垂永遠切切

光緒二十三年丁酉歲七月初三日奉諭照舊重刻

悌弟碑 民國五年

錢世昌

碑在石筍山秀峰觀高五尺廣二尺四寸文二十行行四十字正書徑八分篆額四字徑三寸

悌弟碑記

松陽縣知事錢世昌撰

余奉命承乏松陽下車後時以正人心厚風俗教養斯民爲職志接見士紳恒諄諄言之取閱邑志見夫先賢葉少

松陽縣志

卷三

金石

碑文

百七

蘊潘齋政諸先生之懿行未嘗不心儀之以爲教澤所流必有衍而愈廣者乃每日出庭親理詞訟猶多倫常乖錯之人不勝今昔之感爰令勸學所長自治委員訪舉現存孝友者久未獲復一日偕丁君微垣蔡君鍾栽劉君厚齋張君經傳劉君致通宋君商邱遊秀峰觀見夫石筍玲瓏巖峰奇秀遊覽一周坐談地方利弊民生疾苦相與究政學之原理尋孔顏之樂趣久而忘倦忽一老者出詢之則住觀者也葉其姓宅樹其名熒熒子立影隻形單問以妻帑則曰無問以兄弟則曰已亡矣潛然淚下因詳詢之曰亡弟宅成事我如父朝夕相隨寢食與共耕耘隴畝彼任

其勞捕魚售錢買物膳我六十年來無少倦怠事我之情言之難盡已矣今祇見南山一塊土耳我亦不願獨生言未已放聲大哭予聞而異之詢諸同遊諸君咸稱宅成之美行不置蔡君鍾栽曾爲立傳遂取而閱之有曰葉宅成城東人生有至性痛父早世不及事而以事父之道事兄少兄五歲自幼至老日與兄偕坐同席寢同榻食飲同器相生相養相友相敬相扶持六十年如一日漁業有暇以其餘力種蔬植菓帶星而出先其兄負月而返後其兄市魚百錢除買鹽米外必買旨甘以奉兄擷蔬於圃采菓於園兄不先嘗不食也有事必請於兄兄命之行則行否則

否兄或呵責則笑而受之邑有秀峰觀固名勝地歲出穀陸石爲守闢資歲壬子宅成年六十四宅樹年六十九邑人劉明經可培哀其窮且老將處宅樹於其觀而處宅成於其家宅成泣曰非不感君厚恩顧成與兄誓不一日暫離明經義之遂令合處於觀是年宅成卒其兄恒呼天哭泣云云蔡君躬耕力學慎行謹言諸君皆敦品勵學一時有志之士其言必信而有徵余於是肅然起敬曰有是哉少蘊齋政諸先賢之遺風未遠也當爲之呈請褒揚眾相顧曰彼家貧且無後雖得褒揚令典無力建坊不如做表墓式廬之例爲立一碑以垂不朽余深然之特叙其巔末

勒諸貞砥以爲後之處常倫者告告

中華民國五年歲在丙辰嘉平月吉旦

先農殿碑 民國六年

蔡克猷

據鈔本錄入碑之高廣不計

重修松陽縣先農殿碑記

邑人蔡克猷撰并書

農於四民力最勞職最重爲務最先工之造作商之貿易士之絃誦講肄不足以擬之也萬物充塞於天地悅耳耀目饜口適體業於肆貨於市利用於國計民生產於天者十一殖於農者十九孔子適衛加富於庶加教於富農者富之資教者士之責先富後教則亦先農而後士矣中國

農國也神農氏實爲農家初祖耒耨耜斲教民稼穡民得藝稻粱以爲食樹桑麻以爲衣以生以長以養以教以育子孫以聚國族實維吾初祖之賜天下無不食之人一日無食則飢天下無不衣之人一日無衣則寒衣食有其所自出而不可忘奈何叛我初祖而祖異族滅我初祖之祀而祀異教嗚呼其亦不仁甚矣松陽自壬子以來五閱歲耳災於水者一凶於旱者再民岌岌乎不可終日矣縣知事新昌錢侯下車爲政旣三月乃慨然曰嗚呼孰木無本孰川無源生民粒食孰教而然巍巍先農功孰比焉崇祠報本大典莫先吾將修祀事並爲吾民祈穀實乃卜於丁

已三月七日己亥出其私錢以供祭品省牲之夕必潔必齊將事之辰維誠維敬其日昧爽躬率僚屬執祀事於廟庭觀者咸咨嗟太息稱服其賢以爲錢侯果能事神以福吾民也錢侯以一介儒生出爲縣令特立獨行不泥於故事不顧於羣議毅然舉旣廢之祀典一朝而修復之以爲天下先其可謂知本矣是歲雨節暘時風雷應候二麥旣熟秋稻益豐盜賊不興民氣以舒民歌之曰維我錢侯祀事孔修至誠所格俾我有秋家給人足水旱無憂我侯之德以歌以謳錢侯曰是奚足哉事神有司專職今且垂爲定制歲一祀以爲常顧廟陞崇峻人所瞻仰而藩楹彫剝

曷足以安妥神靈乃修其板檻益其甃瓦治其垣牆經營補葺積累旬日遂告訖功民又歌之曰錢侯爲吏復我廟制藩級拔夷以修以治歲樂年豐於萬斯世維神之德維侯之賜君子於是知錢侯之德又有以固結於其民也縣視學劉君德懷與丁君拱辰宋君微封造蔡氏門而語之曰予不可無一言以記克猷自維迂謬無似於人焉敢苟有論說惟感於錢侯下士之殷好禮之篤學道之果立誠止敬遠利長廉用能事神治人致感格於上下也爰樂爲天下道之丁巳十一月松陽蔡克猷記

據鈔本錄入碑
之高廣不計

重建松陽縣遊宦祠碑記

松陽縣知事錢世昌撰

遊宦祠本在署之東園自改革後傾塌無存昌自民國五

年奉知松事見廨旁有神位一束塵封已久逐一檢視均

係先年循吏雖志書未經備載而口碑猶存令人欽仰昌

宰斯邦於茲兩載愧無善施追蹤前賢誠不忍昔之施德

政於民者任其湮沒爰捐俸重建新宇於西園隙地並置

坐落城東洋砧頭土名念担下田壹坵計額壹畝卽以田

租所入爲每歲俎豆之資以綿香火而垂永久嗣後無論

地方何項公益暨慈善事務均不得撥用所有祭田祀事

松陽縣志

卷三

金石

碑文

百十一

託收支委員程君棻經營每歲夏正元月望日由知事主
祭並邀縣自治委員暨城區自治委員勸學所長等陪祀
以伸崇德報功之意云爾中華民國七年春月立

養濟院碑

民國七年

錢世昌

據鈔本錄入碑
之高廣不計

重修養濟院碑記

松陽縣知事錢世昌撰

歲戊午余承乏松川者二年矣每以不得達民幽隱拯民
疾苦爲慮見夫孤貧殘廢者流棲止無方顛連失所恆怒
焉傷之雖嘗捐俸散給而杯水車薪事終無濟苦不得善
後之策城北舊有養濟院爲貧乏無依棲止之所年久失

修榱崩棟折實不足以蔽風雨擬爲籌款興修聞城紳徐以道先生樂善爲懷熱心公益適其哲嗣商會長佐治君來署余與言之意甚欣然歸請諸父獨任重修遂飭匠開工殘者易之闕者補之舊者新之修築方半而以道先生忽罹時疾竟不起彌留之際猶諄諄以院事未竣爲念吁何其好善之誠也佐治君兄弟承遺命督工修繕越一月落成復請於縣稅項下年撥伍拾金爲散濟窮黎之費蒙省長齊公批准張子云民吾同胞物吾同與李商隱詩云邑有流亡愧俸錢公餘誦咏時爲疚心今得徐先生任其事而流離無告之民差得所有棲息仁人之澤溥矣徐先生享年八十子孫衆多天道福善理固然也所願後之繼起者輸捐納粟接踵而來俾歲費充盈因時拯濟藐茲子遺有所居且有所養詎非地方之幸哉爰叙而記之
中華民國七年十二月吉日立石

邑令錢世昌去思碑

民國八年

高煥然

邑人

碑高六尺五寸廣三二尺文十七行行四十五字正書徑一寸篆額十字徑二寸八分

松陽縣令錢公去思碑記

賜進士出身廣東陞用知府松陽縣孔教會會長高煥然撰文并篆額

廩膳生連步青書丹

昔趙普以半部論語治天下誠哉治術必本於經術也自

古循吏皆屬經生故能以經術飭吏治民國肇興昌言廢經離經畔道之流徧天下荼毒民生競爭權利廢法亂紀經訓無聞又況新學不知經舊學諱言經遂鮮有以經爲治者新昌錢公印世昌號正卿以拔貢出宰吾邑正當革命之後民情浮動政教紛岐官不課經士不談經民雖思經而不敢讀經識者未嘗不歎師儒道喪焚炕之禍將復見於今日也公則反躬出治一本其所得於經者以施之吾民自丙辰冬下車至己未春奉母諱辭職三載以來善政不可枚舉其犖犖大端如倡修聖廟則私淑願學之盛也購置圖書則徵文考獻之事也褒獎耆碩訪禮英賢則

嘉善尊賢之意也救荒濟貧賑孤恤老則博施濟眾之仁也註明糧串杜絕浮收清理詞訟力戒積壓則取民有制使民無訟之道也其尤著者公善岐黃戊午秋疫癘大作日坐堂皇施診贈藥全活無算煥然亦於孔教會附設醫

學研究社請公爲社長細心講授不厭求詳並贈醫書多部餉遺同學起瘡痍而登之仁壽俾末學勿入於岐途公之所賜詎有艾乎其餘先勞無倦學道愛人事實尤多彰彰人口未易縷書實心待人故人亦實心相待真心愛民故民亦真心相愛去之日士民牽袂父老攀轅悲泣歡歌充衢塞道此情此景爲革命以後所未見抑亦前此所罕

見者也廻憶

煥然

作牧粵東三次辭任雖亦士民感戀依

依勿忘終未有茗斯之盛者泊乎歸里養疴老拙不敢復

問世事惟日以孔道凌夷為憂幾謂經術之果無用於時

也不意公獨能本經術以治民而吾民亦遂饜飫而鼓舞

之孟子所謂經正民興者信不誣矣嗟乎王政不聞誰為

砥柱聖道將墜孰挽狂瀾吾松賢令尹魏公良弼後惟公

一人魏公為陽明高弟熟聞明德新民之旨治學具有淵

源公亦曾遊夏靈峰先生之門靈峰當世經師其學術殆

有所本歟爰為之歌曰錢公之學繼往開先錢公之治絕

後空前文章經濟腹笥便便道宗泗水德被松川又歌曰

松陽縣志

卷三

金石

碑文

百十四

松嶺峩峩兮公言稅駕浙水迢迢兮使君可假使君不假
兮誰與施其德化使君其既去兮我弗忘其或重來兮我
尤焚香禱祝之弗暇

中華民國八年己未暮春

醫學研究社員葉承封

陳維新

吳紹文

程棻

劉祖琨 包明奎

紳商農學各界代表潘思謙

葉桐知

徐儒林

劉紹寬 徐履雲

葉逢蔭

潘文衡

潘作霖

葉永滋 周肇洛

潘春鰲

高良仁

麻冕

葉景高 包際昌

吳興宗

朱景文

徐佐

等公全捐貲立石

右錢邑侯去思碑在孔廟左側名宦祠內此碑係生存人著作例不得收惟錢公政蹟真確不誣此記言皆實在毫無溢美且旣已勒石因特附編於金石之末以免散佚重其所記之人非重記者之文也有識者尙其鑒諒之

高煥然謹註

